

IKUSALA NABWIINGA

 Kuvula kwa bantu bacisidwe. Nse konzyi ku babweza boonse ku ciindi comwe. Pele, amuswiilile.

² Ndili kkomene ncobeni kuba kookuno alubo, sunumasiku, mu auditoriamu eyi mbotu, akati ka nkamu eyi mbotuloko ya bantu. Elyo twali kuboola mukati, kubusena okuya, ziindi zisyoonto zyainda, bantu kabaimvvi mu kagwagwa baamba kuti tiiba konzya kunjila. Elyo Nda amba kuti, “Ee, ndiza Ndila konzya kumu janina busena.” Elyo tiiba konzya kubaleta kunselelo. Aboobo Nda usa kuti ta tujisi busena bakubwene bwa mbabo. Ba amba kuti kaanda kaansi kali zwide, akalo. Elyo aboobo tuli uside kujatikizya ceeco. Pele tuli kkomene kuba kookuno, a kukkomana kubona yoonse nkaamu eyi mbotu ya bakautausi, basimakwebo awa, a nyoonse nobaiminizi bazwa ku zibela zyandene zya cisi.

³ Nda jisi coolwe cilemu ca ku kanana cifumo eci ku kalimbabula, cili Nda cibotelwa loko kuba lulemeko ku kukanana kumbele lya bantu bali boobo. Ndali aa ciiyo ca: *I Cikwa Tacikabi Swaana A Whiiti*. Nse konzya kucimanizya. Elyo tee bwali i—i bulubizi bwa mukwesu. Wa soleka kujana sikweendelezya kuti atulekele kukkla kaindi kalamfu aniini, pele ta konzya kucicita. Nda cilumba ncobeni eco, Mukwesu Demos. Eco ncibotu, loko loko. Nda mulumba ncobeni ku buuya bwanu, umwi aumwi wanu. Pele teeба konzya kutu lekela kucicita. Aboobo twa cita buyo ku—cita kujala. Njo cibweza eco, ciindi cimbi, ku umanizya ceeco: *I Cikwa Tacikabi Swaana A Whiiti*. Sena mwa cimvwisy, nywebo nimwaliko? [Mbunga yaamba, “Ameni.”—Mul.] Ndi syoma kuti kwali kunji kuti kuyo mvugwa.

⁴ Lino, Ndi lizi, sunumasiku, kuli nkamu, ya bantu akwalo, aboobo Nse yanda kumujata okuno kwa ciindi cilamfu cakuti muyo impya ceeco. Nkaambo, Ndi yeeya kuti eco cali cikono ncobeni ku—ku bantu basyoma Pentekoste, eyo nkamu ya bantu nje twa kabona busiku bumwi. Cikama cibotu ca bantu, bwiinguzi bubotuloko obo, butonkomene. Candi bamba kulimvwa kabotu loko, ku bona ceeco. Ndi syoma kuti Mwami uyo ileleka, sunumasiku. Alimwi kufumbwa oyo ulanga, ndiza bala syoma. Oyo inga waba mupailo wangu usinizizye.

⁵ Alimwi bulunguluzi bunji loko bwaboola, sunu, kuzwa mu magwalo a kutuminwa, kwa banji kapati baka ponesegwa mu muswaangano oyu. Nda kabotelwa kapati kuli ceeco. Oko, oko, nkubona bantu bacisidwe, oyo ngo musyobo wa mulimo wangu.

⁶ Nda—Nda imikila awa kukambauka. Mebo, nywebo mulizi kuti Nseli mukambausi. Pele Mebo, a boobu, bwaambe bwangu

bwacisyobo cina Kentucky, “his, hain’t” a—a mabala oonse aya, kutegwa Nda—Nda konzya kwaamba eco nco twiita kuti mukambausi wasunu. Nse—Nse kakonzye kubweza busena obo, nkaambo Nse—Nse jisi lwiiyo.

⁷ Pele Ndila botelwa kupandulula eco Nce zyi kujatikizya Ndilyo, kuli bamwi, na eco Nceli mvwa kuti Ndi lizi kujatikizya Ndilyo, kuli bamwi, nzila Nje ka Li ziba, nzila Mbwa kasika kuli ndime. Walo mbuumi bwangu boonse, koonse Nkwe kasola kulangila kuba, alimwi kunji kwiinda Mbwe kasola kuyeeya, kuti inga Nda sola kuba a mweenzuma, nokuceya, aa nyika, cindi Ne kali mulombe muniini. Pele Ndili lumbide ncobeni ku beenzuma balemu sunu.

⁸ Ndili...[Ii mukwesu waamba, “Kuba a penzi syoonto lya kumvwa kusule okuno, Mukwesu Branham. Ko swenesya kapati.”—Mul.] Oh, Mundi jatile. Nda—Nda baanga ndazwa ambaakani awa, amwi, wa amba.

⁹ Lino, kunjila moonya mu kuswaangana, atu jule kubala kwa Lugwalo lumwi. Nda—Nda botelwa lyoonse kubala Bbaibbele, nkaambo Ndi Ijwi lya Leza. Nda syoma obo. Alimwi Ndila Li syoma kuba Ijwi lya Leza litakakilwi. Elyo lino Ndi jisi Magwalo masyoonto aleembedwe ansi awa, a bulembu bumwi obo Mbwe yanda kutondeka, ku ziindi zisyoonto, ndiza, kwa maminiti ali makumi one aosanwe.

¹⁰ Elyo mpawo tula zwa mu ciindi kuunka kuyo bona eyi nkamu ya bantu mbotuloko alubo sunumasiku. Elyo Ndi syoma kuti Leza uyo zumanana kumu longezya ncobeni moonse. Alimwi Ndi lizi kuti mweelede kucita. Elyo Nde elede kweenzya kuya ku Tucson, nekuba, sunumasiku, mwabona, aboobo inga mwaezezya. Oko nkweenzya kwa maoora ali kkumi.

¹¹ Elyo Ndi inka kumasi alandukwa lwizi, alimwi Nde elede kuyaswa ndonga ya ntuntumaanzi yayelo mu kusolekwa cifumo ku mfulumende. Aboobo Nde—Nde elede kusika okuya. Nda kajisi kusaya, buzuba bumwi, elyo taba kabwezi peepe, “peepe” ku bwiinguzi alubo lino. Alimwi Ndi jisi yomwe imbi ya tetanasi a taifasi ya kuyaswa, a misamu yangu igwasilizya.

¹² Aboobo, Ndili lumbide kapati ku coolwe eci a—a muswaangano oyu mubotu ngo twa jisi kakutanaba muswangano wabaiminizi. Kwa kabotelezya moyo wangu. Muli nkamu ya bantu babotu. Ndi syoma kuti Leza uyo mulongezya.

¹³ Cindi oora pati lyonse... Eco cilenge cipati maningi ciyoosya cilede kulaale oko, wa kali tapula okuya ku Alaska, mazuba masyoonto ainda, kawaala mucila wakwe alubo cifumo cino, ambali, kunselelo kuzunguluka mu Washington. Kwayanda utozya nzila eyi, cabuteteete munguzu. Elyo ikuti na Muuya Uusalala wasola kundaambila nconzyo... .

¹⁴ Muntu umwi wali bwiiinguzi...wali kundibuzya eco, “Sa ciyo citikila okuno, Mukwesu Branham?” Peepe, Ta ndizi obo. Ta ndizi ncobeni, kusikila Ndi kazibe. Obo mbwini.

¹⁵ Ndi yanda kusyomeka lyoonse kuli ndinywe. Nse kayeeyeli buyo, kubweza mizeeo yangu, a umwi, eco Nce syoma, na cintucimwi mbuli ceeco. Cindi Nda mwaambila, ciya kuba. Ee, We elede kundaambila, lutaanzi, elyo mpawo Nda mwaambila. Ndi—ndi lizi kuti inyika yoonse ili mu ciimo cakuzungaana. Tuli ku ciindi camamanino. Pele cinto comwe Nce kasola kuba...

¹⁶ Mukwesu Shakarian wali kwaamba cifumo eci, nzila mbwakali kwiinda mu mindando ya mipailo, a kusika kunselelo okuya a kubweza makkadi ayo kumbele lya bantu bakali kuboola, a ku balanga, a kubona naa—naa Nda kabaambila eco ncoba kalembede awo. Ba kalemba misyobo yoonse ya zintu aa makkadi abo amipailo, nywebo mulizi, alimwi wa kali kuyanda buyo kubona na kwakali luleme. Wa kati, kuzwa mu myaanda ayo nga kalanga, kwakanyina comwe caka lubide. [Mukwesu Shakarian waamba, “Taakwe comwe cakalubide.”—Mul.] Takukabi comwe ciyo lubila, mwabona, nkaambo, ku—ku fumbwa kuti kali Leza. Ikuti na Nda sola kulitondezya ndemwini muli ncico, nkokuti cili lubide mpoonya awa ku kutilika.

¹⁷ Il musimbi muniini ulaaba bawisi bakkede, undi swillila lino, kaboola kuli ndime, kutali ciindi cilamfu cainda. Waa kajisi ciloto. Waa kati, “Mukwesu Branham, ino eci ciloto caambanzi?”

¹⁸ Nda kati, “Ta ndizi, mucizi. Njo elela kuvwentauzya, ikuti na Mwami uyo ndaambila.” Aboobo Nda kazumanana a kusola kubuzya Mwami, nkabela Ta kandaambila.

¹⁹ I musimbi muniini waka pilukila alubo. Waa kati, “Ee, lino buli kuli bupanduluzi bwa ciloto cangu?”

²⁰ Nda kati, “Bool a okuno, oyandwa, kkala ansi.” Nda kati, “Bauso a banyoko mbeenzuma kapati. Wabona? Alimwi bala boola lweendo lonse kuzwa ku Canada, bakaleka ncito mukukomena, a kweendenda okuno a ndime. Bala cisyoma eci, eco Nce sola kwaamba. Elyo Nsen a kwaamba cili coonse cilubide kuli umwi, acaali, mu buumi bwangu. Ikuti Nda...Ndi yeeya kuti Ndi lizi eco ciloto nco caamba. Pele kusikila Nda bona ciloto eco lwangu, elyo mpawo Ula konzya kundaambila nco caamba, Nse konzyi ku kwaambila. Mwabona, ikuti na Nda panga buyo cintucimwi, kwayanda kuyooba ciindi oko nkoya kuyandikana ndime akati ka buumi a lufu, elyo mpawo toka zibi naa kundi syoma na pe.”

²¹ Ikuti na Nda kwaambila cimwi mu Zina lya Mwami, nincobeni nceeco. Oyo Ngu waka ndaambila ceeco. Elyo kuciimo, ca myaka eyi yoonse, moonse mu inyika, a kuzunguluka inyika, Ta cina lubide ciindi comwe. Nkaambo...Elyo, lino,

mulizi kuti muntunsi takonzyi kulondoka boobo. Citola Muuya wa Leza kucita ceeco.

²² Elyo lino Ndi jisi Mulumbe oyo Ngwe jisi mulimo. Elyo ziindi zinji Nda kalanganisigwa, akati ka bantu, ee, ndiza umwi oyo utakkali buyo a kuyeeya asyoonto, kuti Nda kali ii—ii, oh, muntu mubi, cakuti Nse kali kuyanda bantu, alimwi lyoonse Nda kali kubazapaula. Alimwi eco tacili boobo. Eco tacili boobo. Nda bayanda bantu. Pele, nywebo mulizi, luyandisyo nkululamika.

²³ Ikuti na mulombe muniini wali kkede mu kagwagwa okuya, elyo wati, “Junior, oyandwa, Nse yandi kuti koli kubusena okuya, pele...” Elyo myootokala kainzwiima kulila munsi lyakwe, elyo wa muleta mukati. Wa zuza kujokela okuya alubo. Baa, inga wamu lulamika. Ikuti na ula muyanda, uyo cita. Weelede kucita.

²⁴ Ikuti na wabona muntu kaimpauka kuselemuka mulonga, kutozya kuli namutitima, mu kaato kaniini, nkabela wa kalizi kuti ako kaato kakali kuyo bbila cindi akuuma namutitima, inga wati, “John, yebo, ndiza weelede kuyeeya aniiini, ndiza tokwe kucikonzya”? Ikuti na Ndi lizi kuteeti taka cikonzyi, Ndiyo tandila kumugusya canguzu kuzwa mu kaato, ikuti na Nda konzya, nkaambo nduyandisyo lucita ceeco.

²⁵ Lino eno, muli yeeyi Milumbe eyo nje Nda kanana, takukwe Ne kasola kunjizya njiisyo ili yoonse, na cimwi cimbi. Nda—Nda cita eco mu mbungano yangu iini. Pele kunze kuno akati ka baalumi abanakazi batubungwe twaandeene amizeezo yaandeene, Ndi soleka buyo kunjizya ciimo caakati, kupandulula; pele kunji oko na wazyalwa ku Muuya wa Leza, Ndi syoma kuti moyo omvwisywa eci Nce pandulula, akati ka bamaalumi Banakristo, Methodisti, Baptisti, Presbyteria, abamwi bambi.

²⁶ Lino, sunumasiku, Ndi yanda kujula ku Matalikilo, icipati ca 24. Ndi yanda kubala i...kutalikila kampango ka 12 ca Matalikilo cipati 24.

Elyo wa kati, O MWAMI Leza...simalelaangu Abrahamu, Nda ku lomba, kondi tuma acoolwe buzuba obuno, a kutondezya luse kuli simalelaangu Abrahamu.

Bona, Ndi limvwi awa kumbali lya kasensa ka maanzi; a bana basimbi ba bantu ba mumunzi baleza kuzooteka maanzi:

Elyo akube kucitike, kuti oyo musimbi Ngwe ntaambile kuti, Wence sendeka i inongo yako, Nda kulomba, kutegwaa Ndi nywe; nkabela walo uyo amba kuti, Nywa, nkabela Ndila nywisya nkamele zyako azyalo: aabe ngo nguwe oyo ngo kasalila mulanda wako Izaka; nkabela kwinda oko Njo ziba kuti wa ndi tondezya luse ku...kuli simalelaangu.

²⁷ Lino mpawo mu Bbuku lya Ciyubunuzyo. Oko nkutalika kwa Bbaibbele, Matalikilo. Lino, ku mamanino aa Bbaibbele, Ndi yanda kubala mu cipati ca 21 ica Ciyubunuzyo, a kampango ka 9.

²⁸ Tu lizi olu Lugwalo lwa Matalikilo awa... Amu kabale cipati coonse, ikuti na mula yanda. Ngu Leza katuma Elieza. Na, Abrahamu katuma Elieza, mundi jatile, kuyo sala nabwiinga wa Izaka. Elyo Rebeka mubotu wakasika, amu kwiingula kulondokede ku mupailo oyo—oyo Elieza, mulanda wa Abrahamu, ngwa akakomba.

Lino mu kampango ka 9 ika Ciyubunuzyo cipati ca 21.

Elyo kwakasika kuli ndime umwi wa baangelo bali ciloba baka jisi mitiba iili ciloba iizwide zipenzyo zili ciloba zyamamanino,aku kanana andime, kwaamba kuti, Boola okuno, nkabela Ndiyo ku tondezya nabwiinga, mukaintu wa Kabelele.

²⁹ Lino Ndi yanda kubweza ciiyo, sunumasiku, kuli ceeco: *I Kusala Nabwiinga*. Elyo eci ni, ikuti na mukwesu wangu oyo urekorda okuno uyo, eyi nje teepu njo konzya kuzumanana aku mwaisya.

³⁰ Elyo lino, muli ceeci, ta caambi ncobeni kuti Ndi kanana eci kuli eyi mbunga iliko, pele aya mateepu alainka kuzunguluka nyika yoonse. Ala sandululwa, mu kasimpe, oh, mulimo mupati wa zisyobo, nekuba mu manyika aa bahedeni kuzunguluka inyika. Tula tumizya mateepu, ca kutabbadezya, ku nkamu ya mbungano. Nkabela ala sandulululwa. A koonse kwiinda mu zisaka zya Africa, a ku India, a kuzunguluka inyika, aya mateepu alainka.

Lino, kusala Nabwiinga!

³¹ Mu zintu zinji zya buumi tula pegwa kulisalila. I nzila ya buumi, lwayo, nku lisalila. Tuli jisi nguzu zya kubamba nzila yesu tobени, kusala nzila yesu tobени eyo nje tu yanda kupona.

³² Lwiyo nku lisalila. Tula konzya kulisalila naa tu yanda kuyoiya, naa ta tuyandi kuyoiya. Oko nkulisalila nko tujisi.

³³ Kululama a kutululama nkulisalila. Mwaalumi uli onse, mwanakazi uli onse, mulombe a musimbi, beeledge kusala naa bayosola kupona kabotu na kutapona kabotu. Nku lisalila.

Kulisalila ncintu cipati.

³⁴ Nkoya kwako Kutamani nku lisalila. Elyo ambweni, sunumasiku, bamwi banu moyo bamba oko—oko kulisalila, oko nkoya kukkala Butamani, oku kuswaangana ka kutaninga mana sunumasiku. Kuyooba ciindi cimwi, eco, ikuti na waka kaka Leza kwa ziindi zinji, kuyooba ciindi cimwi noyaku Mu kaka kwa ciindi camamanino. Kuli keengo akati ka luse a lubeta. Elyo ncintu ca ntenda ku mwaalumi na mwanakazi, mulombe na musimbi, kulyata akusotoka keengo ako, nkambo takucikwe

kujokela wasotoka eco ciindi ceelede kucitwa cimwi. Aboobo, sunumasiku, inga caba ciindi cakuti banji bayo bamba muzeezo wabo—wabo, oko nko bayo kkala Butamani kuyabuya.

³⁵ Kuli akumbi kulisalila oko nko tujisi mu buumi, nkwa, buumi bwa bulongwe. Ii mwaalumi mukubusyi a mwanakazi mukubusyi, kuyutuka ku buumi, wa—wa pegwa nguzu zya kubamba kulisalila. Ii mwaalumi mukubusyi ulalisalila. Ii mwanakazi mukubusyi uli jisi nguzu zya kuzumina na ku cikaka. Pele nekubaboobo kucili kulisalila, ku mabazu obilo. Bobilo mwaalumi a mwanakazi, bali jisi nguzu zya kulisalila.

Ayebo, uli jisi kulisalila, mbuli Munakristo.

³⁶ Uli jisi kulisalila mbungano, omuno mu America, ku ciimo, oko nkokonzya kwiinka. Eco ncoolwe cako cina America, kusala kufumbwa mbungano njo yanda kuzulilwa ko. Oko nkulisalila. Yebo toeledge kuunka kuli imwi ya ngawo, ikuti na toyandi kucita obo. Pele ikuti na uyanda kucinca kuzwa ku Methodisti kuyaku Baptisti, na Katolika kuyaku Protestant, na kuli imwi imbi, takukwe naba omwe ukonzya ku kwaambila na ku kubamba kusika kuli imwi mbungano. Olo lwesu—olo ndwaanguluko lwesu. Eco nce ciyanza cesu cakulisalila. Muntu uli onse ulakonzya kulisalila lwakwe. Lwaanguluko lwa bukombi, nkabela eco ii—ii ncintu cipati. Leza atu gwasye ku cibamba kufumbwa kuti ka tukonzya.

³⁷ Uli jisi akwalo kulisalila. Naa . . . Ciindi wa sala mbungano eyi, ula konzya kusala naa yebo, muli eyi mbungano, naa inga uyoosala mbungano iyooku solweda nkoya kwako Kutamani. Ula konzya kusala mbungano eyo ijisi buzumini bumwi, kutegwa ukonzye kuyeeya kuti obo buzumini mbombubo mbo yanda. Nanka, mbungano ijisi kayanza kabo.

³⁸ Elyo mpawo ndeelyo Ijwi ly a Leza, uli jisi kusala kuli ndilyo. We eleded kubamba kulisalila.

Ngooyo mulao utalemedwe akati kesu, wa kusala.

³⁹ Nda syoma wakali Eliya, ciindi comwe, atala aa Cilundu ca Karimeleki, nikwakamana kazekelo, mu oora pati lyantenda elyo ndyo tu tandila kusika ndyoonya lino. Elyo antela, inga kwaba kuli nduwe na kuli Ndime, sunumasiku, kutegwa tu bambe kulisalila oku, mbuli ku lucitiko lwaku Cilundu ca Karimeli. Mukasimpe, Ndi yeeya lulazumanana, inyika yoonse, lino. Pele kuyooba ciindi mpoya kuyandika kubamba kulisalila.

⁴⁰ Elyo nywebo nobaalumi okuno, ba mambungano anu aatubungwe, amu syome buyo eci, kuti oora lili ali ndinywe, ciindi mwa bamba kulisalila. Antela moyo onjila mu Kkanso ya Inyika, nape tamukabi limbi kabungwe. Moyoo oeleta kuba kucita ceeco, nkabela oko kulisalila kula boola calino.

⁴¹ Elyo ncintu cantenda kulindila mane eelyo oora lyamamanino, akwalo, nkaambo uyo bweza cintu eco nco takaa

konzyi kulekezya kuzwa kuli ncico. Nywebo mulizi, kuli ciindi ncomu konzya kucenjezegwa, mpawo, ikuti na mwasotoka ako keengo ka kucenjezegwa mpawo mwaka gwalwa kale ku lubazu lumwi, kudindwa.

⁴² Amuyeyye, cindi ca mwaka wa jubbili niwa kasika, nkabela i—i mupaizi wa keenzya akulizya mweembo wakwe, wakuti kufumbwa muzike wakali kukonzya kwaanguluka. Pele ikuti na bakaka kutambula lwaanguluko lwabo, mpawo wa keelede kutolwa ku tempele, ku cikunguzyo, akumu donkola ku kutwi akadonkozyo, elyo mpawo wa belekela simalela wakwe lyoonse. Kaka bikkwa ku kutwi kwakwe ku cikozyanyo, ca kamvwa. “Lusyomo lulaboola ku kumvwa.” Wa kaumvwa ulya mweembo, pele taakwe nakayanda kuuswiilila.

⁴³ Elyo ciindi zinji, baalumi a banakazi balamvwa Bwini bwa Leza, aku Bu bona kabusimpikizigwa a kutondezegwa, Bwini, pele nekuba ta bayandi ku swiilila kuli Mbubo. Kuli kamwi kaambo. Kuli kumwi kusala oko nko bajisi, kunze lya kulanganya Bwini a tusimpe, nkikaako matwi abo inga asinkwa ku Makanimabotu. Ta ba Kaa mvwi limbi. Kukulwaizya kwangu kuli ndinywe, cindi Leza akanana ku moyo wako, mpawo kocita mpoonya awo.

⁴⁴ Eliya waka bapa kulisalila, oko nko bakeelede: “Amusale obuno buzuba oyo ngo maya kubelekela. Ikuti na Leza ngu Leza, amu Mu belekele. Pele ikuti na Baala ngu Leza, amu mubelekele.”

⁴⁵ Lino, mbuli mbo tubona zintu zyoonse zyakunyama nzitondezyo ku zintu zya kumuuya, mbuli mbo twainda mu ciiyo cesu cifumo cino, mbuli zuba a bulengwe bwalyo. Elyo lyakali Bbaibbele lyangu litaanzi. Nke Ta nasola kubala peegi mu Bbaibbele, Nda kalimuzi Leza. Nkaambo, Bbaibbele lili lembedwe kuli koonsa mu bulenge, alimwi buleendelana ncobeni a Ijwi lya Leza: mbuli ikufwa, kuzikkwa, bubuke bwa bulenge; a zuba kalipasuka, kukosola, kubbila, kalifwa, kalipasuka alubo. Kuli zintu zinji loko nzo tukonzya kukozyanisa, Leza mu bulenge, mo tweede kweenguluka, nkambo ka Mulumbe oyu.

⁴⁶ Lino, ikuti na zya kumuuya, na, zyakunyama nzikozyanyo kuli zya kumuuya, nkokuti, kusala nabwiinga, kunyama, ncikozyanyo ca kusala Nabwiinga, Nabwiinga, kumuuya.

⁴⁷ Lino, ncintu cakusinizya cindi nco twainka ku kusala mukaintu, mwaalumi, nkambo zikonke awa nzyakuti “mane lufu luka twandaanye.” Obo mbo tweede ku cibamba. Elyo ula bweza cikonke eco kumbele lya Leza, cakuti lufu luzutu ndoluyo mwandaanya. Elyo Ndi yeeya kuti tweede...Ii mwaalumi mu kuyeyya kwakwe kululeme, oyo ukanzila zya ziciza, kuti weede kusala mukaintu oyo ca kusongwaala. Ko cenjela eco ncocita. A mwanakazi kasala mulumi, na kuzumina kusala kwa mulumi, weede kucenjela loko kuli ceeco ncacita, alimwi

kapati mu mazuba asunu. Ii mwaalumi weeledge kuyeyya a kukomba kataninga sala mukaintu.

⁴⁸ Nda yeeya, sunu, cipangisya twaambo tunji twa kulekana lino, cakuti tula isololela inyika mu America, mu twaambo twa kulekana. Tula sololela inyika imbi yoonse. Okuno kuli kulekana kunji kwinda masena oonse aambi, eci cisi, alimwi ceelede kuba, aku yeeyelwa kuba, cisi ca Bunakristo. Ino mause, nkuta zyesu zya kulekanina! Nda yeeya, cintu ciletelezya, nkaambo kakuti bamaalumi baka tantamuka kuzwa kuli Leza, a banakazi baka tantamuka kuzwa kuli Leza.

⁴⁹ Elyo tu jana, kuteeti, ikuti na mwaalumi wakakomba kuzwidilila a mwanakazi wakakomba kuzwidilila kujatikizya nkani; kutali kulanga buyo kubambwa kabotu kwa meso, na makkuko mapati mayumu, na mbuli obo, na kusukamina kwanyika kumwi; pele inga walanga kuli Leza lutaanzia, a kwaamba, “Leza, sena obu mbo bukanze Bwako na?”

⁵⁰ Nda yeeya, sunu, kuli kucenga kunji loko, mbubonya buyo mbuli mu cikolo. Cindi—cindi bana baboola, cifumo, bunji bwa bana mu busena aaengelede, obo—obo beenzuma bangu, bayo boola a kwaamba kuti, “Mukwesu Branham, sena inga wa tukombela? Tu nojisi i—i musunko sunu. Nda—Nda beleka busiku boonse, nkabela Nse boneka kuti inga—inga Ndi cibamba. Kondi kombela.” Nda yeeya kuti kufumbwa mwana wa cikolo, ikuti na inga wacita, ikuti na... Abalo bazalyi cifumo ku tafule, inga wa amba, “Baama, John, ujisi musunko sunu. Atu mukombele lino.” Nda yeeya kuti inga ca zunda zyoense nze mukonzya kusola mu nzila imwi, na kusondela ku pepa lya muntuumwi a kubeja, Nda yeeya, ikuti na mwa boola buyo aku kombela nkani.

⁵¹ Elyo ikuti na twa konzya langalanga eco ncotu cita cindi twa kuyanda kukwatana, cindi notusala mukaintu wesu, mulumi wesu, ikuti na twa cilangalanga coonse! Ii mwaalumi weeledge kukomba cakusiniza, nkambo inga wa nyonganya buumi bwakwe boonse. Amuyeeye, cikonke ncakuti “kusikila lufu luka twandaanye,” nkabela ulakonzya kunyonyoona buumi bwakwe kwiinda ku kusala kutaluleme. Pele ikuti na wa ziba kuti, ubamba kusala kutaluleme alimwi ukwata mwanakazi oyo uuteeeli kuba mukaintu wakwe, nkabela wa cicita nokuba, nkokuti mbulubizi bwako. Ikuti na mwanakazi wakabweza mulumi nkabela ulizi kuti taeleli kuba mulumi kuli nduwe, nkokuti obo mbulubizi bwako, wamana kuziba eco ciluleme a cilubide. Aboobo, toeledge ku cicita kusikila wa cikombela kumaninina mu kuzwidilila.

⁵² Cila bikkwa mbubonya ku kusala mbungano. Lino, weeledge ku kombela mbungano eyo njo bunganina mo. Koyeeya, mambungano eenda a muuya.

⁵³ Lino, Ta ndiyandi kuba sikukazya. Pele Ndila mwewisya kuti Ndili mudaala, alimwi Nde elede kuzoozwa okuno, bumwi bwa mazuba aya. Elyo Nde elede kuyoopeda bwiinguzi ku Buzuba bwa Lubeta kuli ceeco nce Nda amba sunumasiku na kufumbwa ciindi cimbi. Mpawo Mebo, nkikaako, Nde elede kulamwa nconzyo akusiniza cakumanininina.

⁵⁴ Pele, ukainka mu mbungano, nkabela ikuti na uyo langilila kulilemeka kwa mbungano eyo, akulangilila buyo mweembeli asyonto, elyo kanji uyo jana kuti mbungano ililemeka mbuli mweembeli. Zimwiziindi, Nda libuzya ikuti na ta tubwezelani muuya wa umwi aumwi mubusena bwa Muuya Uusalala. Ula sika mu busena oko mweembeli nkiali singunzuunzu ncobeni akuli lemeka bumwi, uyo jana kuti mbunga ili mu nzila njiyonya. Ndiyo muleta ku mbungano oko Nkwe kabona mweembeli kaimikila, kaba gunyanya mitwe yabo koonse a koonse. Ko langilila mbunga, bala cita cintu nciconya. Ko bweza mweembeli, kuyoya buyo canguzu ku cintu cili coonse, kanjikanji mbungano iyoocita cintu nciconya. Aboobo, ikuti na Nda elede kusala mbungano, inga Nda sala mbungan iini ya Bbaibble, yambaakani, iya Makanimabotu Azwide, ikuti na Nda elede kusala imwi ya kunjizya mukwasyi wangu. Kusala. Nda kalanga...

⁵⁵ Ii balombe, buzuba bumwi, mwana wa Mukwesu Shakariani amulumi wa mwana wakwe, bakandi tola atala kuyo kombela mulombwana mukubusyi, mwiimbi, mulombe ulikabotu loko. Kajokela buyo... Fred Barker, elyo nde lyakali zina lyakwe, mu kujokela buyo kuzwa mu lweendo. Elyo baka nditumina kuti, "Fred wakali kufwa." Elyo mpawo, Nke taninga kunjila mu ng'anda, aumbi mulumbe wakasika, "Ambweni ulifwide ndyoonya lino." Elyo wa kati waka jisi jisi kuzwa ii—ii malowa mu boongo, alimwi wakali lebukide, elyo—elyo wa kali mukufwa, nkabela mukaintu wakwe wakali kuyanda kuti ndika mukombele.

⁵⁶ Elyo Nda kayeeya, "Oh, ikuti na Nda sola kuuluka, inga kanofwide Nke taninga kusika okuya, alimwi ambweni ulifwide lino." Aboobo, Nda katumina cakufwambaana aku kwabana a mulindu muniini ku fooni. Elyo—elyo twa kabikka fooni ku zikwabanyo,aku kutwi kwa Fred. Ta akali kukonzya kumena. Ba kali kumupa kumena kwakupanga. Elyo cindi nitwaka mu kombela, wa kati, katondezya, kuti ba cigwisye kuzwa ku kameneno kakwe. Wa kakonzya kumena. I bamadokotela tii baka cisyoma. Ba kacigwisya, nkabela wa kali kukonzya kumena. Wa ka kkala, buzuba abumwi.

Ii mbungano; kusala mbungano.

⁵⁷ Kwiitwa kwa fooni kwazwaa kusika, kaindi kainda. Cifumo cino, memba wa mu mbungano yangu, uuli mwanakazi muna Baptisti ncobeni uzwa ku Lousiville, waa fwa kumatalikilo

acifumo cino. Elyo mbungano yangu ku muunzi, nkamu ini ya baalumi ba kalisalazya, balibunganya antoomwe akwiinka kunselelo, basikubamba bafu kabataninga kumucita imbaumu, baimikila munsi lyakwe, ba komba kusikila buumi bwa jokela muli nguwe. Nkabela muumi, sunumasiku. I baalu ba mu mbungano yangu, baa, baka yiisigwa kusyoma kuti zintuzyonse nzitete, boola kuli Leza cakusinizya.

Aboobo, twe elede kubamba kusala kululeme.

⁵⁸ Alubo, imusyobo wa mwanakazi oyo mwaalumi ngwa konzya kusala, uyo tonddezya kuyandisyia kwakwe a ciimo cakwe. Ikuti na mwaalumi wa sala mwanakazi utaluleme, citondezya ciimo cakwe. A cintu nca lyaanga mwini, kutondezya kasimpe eco cili muli nguwe. Ii mwanakazi utondezya ceeco cili mu mwaalumi kucindi namusala kuba mukaintu. Ci tonddezya cili kunsi kwa moyo. Tacikwe makani eco nca amba anze, kolangilila oyo ngwa kwete.

⁵⁹ Nda inka ku ofesi lya muntu, nkabela wa amba kuti Munakristo; pele kabikkide zifoto zya muntu ukwelelezya koonse ku bwaanda, eco ciimbo ca bbogi-wuugi kaciya bulila. Ta ndikwe ndaba ceeco nca amba. Ta ndi syomi bumboni bwakwe, nkambo muuya wakwe usaninwa a zintu zya mu nyika. Baa, kwaamba, ikuti na inga wa kwata musimbi sikudana kwiinda, na kuti inga wa kwata namalelo wankwela, na rikketa buyo, mubotu wabusyaasunu? Ci latondezya. Ci tonddezya nca jisi mu mizeezo yakwe, ca muunzi wakwe uuciza mbouya kuba, nkambo waa mubwezela kuyo mu komezezya bana bakwe. Alimwi kufumbwa mbwa bede, nje nzila njayo komezya bana abo. Aboobo, ci tonddezya ceeco cili mu mwaalumi. Ii mwaalumi uubweza mwanakazi mbuli oyo, citondezya buyo obo mbwa yeeya ziciza.

⁶⁰ Sa inga mwa yeeya Munakristo kucita cintu mbuli ceeco? Peepe, munene. Inga nse cita. Ii Munakristo wini ta kayandauli banamalelo beebeaka boobo, musimbi wiinda kudana, a banamalelo bankwela. Uyo yandaula Munakristo wa ciimo.

⁶¹ Lino, to konzyi kuba aa zintu zyoonse. Kweelede kuba musimbi omwe oyo mubotu ncobeni. Elyo musimbi uumbi, ambweni uli... nkabela ciwa cakwe kaciboneka kabotu kwiinda ca oyu. Alimwi antela inga wayandika kutuulila omwe kwinda umbi, pele, ikuti na tali mu ciwa ca mulindu, ca mwanakazi. Mpawo, waa... Ta ndikwe makani naa mubotu na pe. Ncibotu walangilila ciimo cakwe, naa mubotu na tali mubotu.

⁶² Lino, nkambo, cila yandika, ikuti na Munakristo wayanda kusala mukaintu, we elede kusala mwanakazi, wini wakazyalululwa katalanganya mbuli mbwa boneka. Mboobo mbwabede, eco cimubumba. Elyo mpawo, alubo, eco citondezya ciimo cakwe cini cabunaleza, a kutondezya eco cili mu mizeezo yakwe aceeco ciyooba kuciindi ciciza, nkambo mukwasyi wakwe

uyo komezegwa kwiinda ku mwanakazi uuli boobo, ku makanze aaciza aa muunzi wakwe.

⁶³ Ikuti na wakwata umwi wa baaba ba rikketa baniini basyaasunu, banamalelo bankwela, ino ncinzi ncanga waakulangila? Ino musyobo nzi wa muunzi muntu ngwa konzya kuyo langila? Ikuti na wakwata musimbi oyo uta jisi bulemu bweelede bwa kukkanala aa muunzi a kumamela ng'anda, auyandisya kubelekela ku ofesi lya muntuumwi, ino inga waba sikubamba wang'anda wa musyobo uli buti? Uyo oba abasikulela bavwanda a zintuzyonse zimbi. Ni ncobeni.

⁶⁴ Lino, Mebo nseye ndisyi obu bubotu bwa busyaasunu, bwa banakazi kuti kababeleka. Cindi Nda bona banakazi kabasamide mayunifoomu, kabeezya kuzunguluka dolopo eli, kabeenzya mahonda, mbuli basilikali, mause ku dolopo lili lyoonse liyo lekela mwanakazi kucita eco. Mwabona? Mwabona? Kakuli bamaalumi banji bata jisi ncito, eco citondeezya kuyeeza kwa busyaasunu kwa dolopo lyesu. Ci tondezya kuubausya. Ta tweede kuba a banakazi ku masena okuya mbuli boobo. Ta jisi mulimo ku masena oko mbuli ayo.

⁶⁵ Cindi Leza nakapa mukaintu ku mwaalumi, Wa kamupa cintu cibotu kwiinda Nca konzya ku mupa, kunze lya lufutuko. Pele cindi umwi aunka kusola kubweza busena bwa mwaalumi, mpawo utandila kuba cintu ciinda kubija nca konzya kujata. Lino, mbo mbubo. Mwabona?

Lino inga twabona kubikkwa kwa kumuuya.

⁶⁶ Ndi—Ndi—lizi ncibyaabi, mu yeeza kuti ncibyaabi, pele mbo Bwini. Ta tukwe ndaba aboobo mbo cili cibyaabi, twe elede kulanganya kasimpe. Obo mbo mbubo Bbaibbele mboli yiisya. Mwabona?

⁶⁷ Lino, mpawa twa bona cantangalala bubambe bwa kumuuya, kukanza kwa Leza ku Muunzi Wakwe uuciza a Nabwiinga Wakwe uuciza, kuboola kubonekela lino.

⁶⁸ Ikuti na mwaalumi wakwata namalelo wankwela, mula cibona eco nca langila ciciza. Ikuti na mwaalumi wakwata mwanakazi oyo uta kakkali aa muunzi, mula cibona eco nca langila ciciza. Alimwi Mebo ciindi cimwi . . .

⁶⁹ Eci cimvwika bubyabi loko. Nda limvwa buyo ku caamba. Elyo Mebo—Mebo, kanjikanji, ikuti na Nda limvwa kwaamba cintu, Nde elede ku caamba. Alimwi kanji inga ni nzila ya Leza.

⁷⁰ Nda—Nda kali kweenda a simpulazi wa ng'ombe oyo ngwe Nda kali kubeleka awe, ku kuula ng'ombe. Elo lyoonse Nda kali kubona mulombwana kalangisisya ku busyu bwa ng'ombempwizi katu tninga inka kupunda muulo wa kuula. Mpawo wali kunyona mutwe wayo, akulanga koonse. Nda ka mutobelela ambali, kamu langilila. Mpawo wa kiilanga atala ansi, ikuti na yakali kulibonya kuba kabotu, mu bube. Mpawo

wali kunyona a kulanga ku busyu bwa njiyo, aziindi zimwi wali kuzungaanya mutwe wakwe a kuzwa.

Nda kati, "Jeff, Ndi yanda ku kubuzya cintucimwi."

Wa kati, "Ko amba, Bill."

⁷¹ Elyo Nda kati, "Nkaambonzi lyoonse nco langisisya ku meso lya ng'ombempwizi?" Nda kati, "I langika kabotu, ni ng'ombempwizi mbotu—mbotu ndemu."

⁷² Kati, "Ndi yanda ku kwaambila, mulombe, we elede kwiiya kunji loko." Elyo Nda—Nda ka cimvwisya nakamana ku ndaambila. Kati, "Nse kwe makani aboobo mbo ipangidwe. Antela njanyama, kusikila ku nsumba. Pele ikuti na ijisi kugwenauka kwa bukali mu busyu bwayo, uta kasoli ku yuula."

Kati, "Nkambonzi obo, Jeff?"

⁷³ "Ee," kati, "cintu citaanzi nca kuti," kati "taika konzyi ku kkalikila." Elyo wa kati, "Ii cintu cabili nca kuti, ta ikakonzyi kukomezya munamani wayo." Elyo kati, "Ba ibikkide mu cimpati lino, nkaambo kakuti ili neneede. Wa yaangulula, a kugwenauka oko kwa bukali, ilakonzya kulibinga lwalo ku lufu."

⁷⁴ Nda kati, "Yebo ulizi, Nda aba kubaanga nkwiyya cintucimwi. Nda syoma kuti cila bikkwa ku banakazi, akwalo." Yaa. Yaa.

⁷⁵ Oko kulanga kugwenauka, kwa bukali, kwa rikketa, ncibotu waitantamuka, mulombe, ezyo zintu zyoonse zya bbulu zila atala aa meso akwe. Elyo Inga nse... Inga nse ciyanda eco. Ta ndi yeeyi kuti eco inga ceelela ku Munakristo. Ta ndikwe ndaba obo kunji televizhioni a mitende mbo zyaamba kuti cileebeka. Oko nkuboneka kubbi kapati, kubonekela kuyoosya Nkwe kasola kubona mu buumi bwangu.

⁷⁶ Cindi Ne kasaanguna kubona ceeco, okuno ku Cafeteria yaku Clifton, cifumo cimwi, ku kalimbabula... Nda kabona bamwi ba balindu bakubusyi kaba boola. Mukwesu Arganbright wa kazwaa kunjila, a Mebo. Alimwi walo kainka kuselemuka matantilo. Elyo Nda ka langa, alakwe oyo musimbi waka njila. Nda kayeeya, "Ee, Ta-Ta-Ta-Ta ndizi." Ta ndina cibwene. Wa kali musyobo umwi. Oh, ca kaboneka mbuli kuti kali cilonda, nywebo mulizi, musyobo buyo waku boneka kweenzu. Ta nda ambi ceecei kuba cakusesya. Nda—Nda ca amba. Nywebo mulizi, Nda kabona cinsenda. Ndili muna missionari. Nda kabona misyobo yoonse ya myeengo, nywebo mulizi, obo malwazi. Elyo Nda kali kwiinka ku mulindu musyoonto aku mwaambila, "Ndi—Ndi—Ndi li mukutausi. Nda—Nda kombela balwazi. Sa inga—inga wa yanda kuti ndiku kombele?" Alimwi Nse ninga bwene cintu cili coonse mbuli ceeco. Elyo mpawo, mpaawa kwa kaboola bobile na botatwe bambi, mukati. Nda kabaanga ndajokela musyule mpawo a kulindila.

⁷⁷ Elyo Mukwesu Arganbright wakasika munsi, aboobo Nda kati, "Mukwesu Arganbright?" Ambweni inga kali waano. Nda kati, "Ino ndi penzi nzi ayooyo mwanakazi?" Wabona?

Elyo wa kati, "Ulya, ulya musila."

⁷⁸ Nda kati, "Ee, ma, ma!" Wabona? Nda kali kuyeeya kuti ba keelede ku mubambilu mu ng'anda ya balwazi bazipenzyo ku busena bumwi, nywebo mulizi, ku kwabilila kuti cita mwaikili kuli bambi banakazi.

⁷⁹ Pele, nywebo mulizi, mwe elede kuyeeya, kulangisya, kukomba, cindi wano sala. Nkambo, kwiinda kuli ceeci, tula bona, Ijwi lya cisyomezyo. Walo, nabwiinga oyo mwaalumi ngwa konzya kusala, uyo tondezya ciimo cakwe. Ci tondezya cili muli nguwe.

⁸⁰ Lino, sena inga mwayeeya mwaalumi, uuzwide Muuya Uusalala, kubweza cintucimwi mbuli ceeco kuti abe mukaintu wakwe? [Mbunga yaamba, "Peepe."—Mul.] Ta-Ta-Ta ndi ciboni ncobeni, mukwesu. Lino, ambweni Ndili buyo mudaala ujisi mizeezo iigambya. Pele, nywebo mulizi, Ta-Ta ndi cimwisyi buyo, mwabona, amubone, nkambo ciyo tondezya ceeco cili muli nguwe. Uyo mu gwasya kubamba muunzi wakwe uuciza.

⁸¹ Lino, mpawo, cindi twa cincakujoka buyo kwa kaindi kaniini, ku bbazu lya kumuuya. Elyo cindi mwa bona mbungano ili mu nyika, kaililemeka mbuli inyika, kulangila muli zya inyika, kuba cibeele ca inyika, kubala Milawo ya Leza mbuli kuti taakwe Na aka Illemba, mpawo inga mwa-mwa konzya buyo kuyeeya kuti Kristo ta katoli Nabwiinga uli boobo. Sena inga mwayeeya kubweza mbungano ya busyaasunu kuba Nabwiinga mbungano? Kutali Mwami wangu. Ta ndi... Ta ndiboni ceeco ncobeni. Peepe. Amuyeeye, lino, mwaalumi a mukaintu wakwe mbamwi. Sena inga waliswaanganya ku muntu uuli boobo? Ikuti na inga wacita, inga kwa baanga kwa tyompya lusyomo lwangu muli nduwe.

⁸² Elyo, mpawo, mbobuti Leza kaliswaanganya Mwini ku cintu cili boobo, sikuvuula watubungwe walyoonse? Muyeeya kuti inga Wa cicita eco na, "Bajisi ciwa ca bukombi pele ka bakaka nguzu zya mbubo"? Inga ta cicita. We elede kuba a ciimo Cakwe muli nguwe. I Mbungano iini, yaka zyalululwa kasimpe, yeelede kuba a i-i ciimo eco cakali muli Kristo, nkaambo mulumi amukaintu mbamwi. Alimwi na Jesu wa kacita eco biyo caka botezya Leza, kabamba Ijwi Lyakwe aku zibya Ijwi Lyakwe, nkokuti Nabwiinga Wakwe we elede kuba aciimo ca musyobo nguwena. Inga na takakonzya, pe ku nzila ili yoonse, kuba kabungwe. Nkaambo, mpawo tacikwe makani obo kunji nkoyanda kwaamba kuti, "peepe," yeendelezegwa aa boardi kubusena bumwi, yalo imwaambila ceeco cakucitaanca taelede kucita, a, ziindi zinji, mamaile ali milioni kuzwa ku Ijwi lya bwini.

⁸³ Nci byaabili loko kuti twa katantamuka kuzwa ku Musololi wini oyo Leza ngwa katusila ku sololela Mbungano. Ta akatuma baalu balanga cooko. Ta akatuma bamabishopo, bakkadinalo, bapaizi, bamapoopo. Waka tuma Muuya Uusalala ku Mbungano, ku kusololela Mbungano. “Cindi Walo Muuya Uusalala waasika, Uyo musolweda mu Bwini boonse, kuyubununa zintu ezi kuli ndinywe, nze Nda ka mwaambila, kuzileta ku kwiibaluka kwanu, akuyo mutondezya zintu ziciboola.” I Muuya Uusalala wa kali kuyoocita ceeco. Lino, mbungano yabusyaasunu ila usulaika Oyo. Ta ba Ci yandi, aboobo mbobuti mba konzya kuba Nabwiinga wa Kristo? I bantu basunu nkusala kabungwe kabusyaasunu. Cintu neo cicita, citondezya buyo kutamvwisywa kwabo kwaansi kwa Ijwi.

⁸⁴ Ta ndi kanzi kucitya kucisa, pele Ndi kanza kulekela kusakana kwini kusikila mulange kuli ncico.

⁸⁵ Nda ka kwatya banabukwetene banji, pele lyoonse kundiyeeyza Kristo a Nabwiinga Wakwe. Umwi wa micado eyo Nje kaendelezya okuno, ciindi cimwi cakamana, ca—ca kali cintu cibotu kapati cakakubwene mu buumi bwangu. Yaba myaka misyoonto yainda, cindi Ne ka cili mukutausi musyoonto.

⁸⁶ Mwanawakwesu wa kali kubeleka i—i ku PWA. Ta ndizi umwi inga wasola kuyeeya ku yeeya ceeco, nekuba, na pe, umwi mupati mbuli ndime. Lino oyo wakali i—i mulimo mfulumende ngo yaka jisi. Elyo mwanawakwesu wakali kubeleka kutala, kutandila mamaile aali makumi otatwe. Ba kali kusya ziziba, mulimo wa kubambilila zilengwaleza.

⁸⁷ Elyo kwakali mulombe wa kali kubeleka anguwe, kutala okuya, kazwa ku Indianapolis, kutandila, oh, kutandila mamaile aali mwaanda atala lya Jeffersonville oko Nkwe—Nkwe nda kali kukkanala, na kukkanala. Elyo kwakali i... Wa kati ku mukwesu wangu, buzuba bumwi, wa kati, “Doc,” wa kati, “Ndi—Ndi yanda... Ndi yanda kuyo okwata, ikuti na Nda jana mali akubwene akubbadebla mukambausi.” Wa kati, “Ndi—Ndi jisi mali buyo akubwene kuti ndijane lainsensi lyangu, pele,” kati, “Ta ndijisi mali akubwene aakuti ndi bbadele mukambausi.”

⁸⁸ Doc wakati, “Ee, mukwesu wangu mukambausi, elyo—elyo inga—inga wa ku kwatanya.” Wa kati, “Ta bbadelesyi bantu ku zintu zili boobo.”

Wa kati, “Sa inga waakundi lombela nguwe kuti andi kwatanye?”

⁸⁹ Ee obo busiku mwanakwesu waka ndilomba. Nda kati, “Ikuti na taakwe nakakwete, naba umwi wabo, nkabela bayo... zintuzyonse zili kabotu.”

Wa kati, “Ee, inzya, Ndiyo mubuzya.”

Elyo Nda kati, “Ikuti mbo cibede, kamwa ambile, mukaboole kunselelo.”

⁹⁰ Aboobo, cindi Mujibelo niwakasika awalo mulombe wakasika kunselelo. Ca kali cintu cabulemu kuli ndime, lyoonse kucebuka kuli ceeći. Ndi la... Masikati akajisi mvula maningi, na mootokala wamusyobo wa Chevrolet, amalati mapati kaangilidwe amawaya atakwabilidwe, oyo wa keenzya, kumbele. Kumane ciindi cisyoonto kuzwa ni Nda ka fwidwa mukaintu, elyo Nda kali kubamba zintu munkamu yazyo, mu twaanda tobile. Elyo—elyo Doc wakali kutala okuya andime, katu lindilila mbabo.

⁹¹ Elyo—elyo mulombe wa kazwa mu mootokala, pele camasimpe taakwe naakali kulibonya mbuli sibwinga, kuli ndime, nekuba kuli umwi muntu, Nda yeeyela. Inzya. Nda konzya kuula mabbusu mabotu loko, aatola dollar a cisela. Elyo wa kasamide obilo, aaka limbwa. A bulukwe bwakwe bwa bupati mumbali. Elyo waka samide limwi lya majakete aabutonje bunji. Ta ndi yeeyeli kuti na umwi nywebo nobantu bapati inga wakonzya kuyeeya. Lya kaboneka mbuli kuti lya kainzigwa buyo mu muncina wakusanza kwa ciindi comwe kakutakwe kusukuluzya, nkabela lya kali amyeengo, ka lyaangidwe mbuli *boobo*, akkona mujulu.

⁹² Lino ii—ii mulindu muniini wa kazwa ku bbazu limbi, kasamide kadresi kaniini, oh, ka tumwi oto tuboneka kuba amampana.

⁹³ Ta ndi zyi. Nda ka lubizya kwiita musyobo wa zintu zili *boobo*, ciindi cimwi. Gingham, Nda syoma mbo liitwa. Elyo aboobo lyakabede i...[Mbunga yaseka—Mul.] Nda lyaamba buteensi alubo. Nda—Nda cicita lyoonse. Elyo Nda kati...

⁹⁴ Waa kazwa mu mootokala, mpawo baka tanta amatantilo. Elyo—elyo cindi neba kanjila, muntu mucete, waa... Nda yeeyela, waa, nca kasamide buyo wakali musinsi. Alimwi ncobeni taakwe na akasamide mabbusu, pe, ku maulu. Waa kantantila munzila kuzwa ku Indianapolis, kumusanza. Kajisi masusu masyoonto kaalengelela kuyaansi, kusule, mu kulampa, kubaanga nkooswa kaaselela sule lyakwe. Kalangika bwana loko.

Elyo Nda kati kuli nguwe, “Sena waka komena kusika kuciimo cakukwatwa?”

⁹⁵ Waa kati, “Iiyi, munene.” Alimwi waa kati, “Ndi jisi bulembu bwa kuzumizigwa buzwa kuli bataata a baama.” Waa kati, “Nde elede kubutondezya okuno ku—ku nkuta, kutegwa ndijane laisensi yangu.”

⁹⁶ Nda kati, “Ncibotu.” Nda kati, “Ndi yanda ku kanana kuli ndinywe katu taninga cita mucado oyu.” Ba kakkala ansi. I mulombe waka zumanana kulanga ng’anda koonse; wa kali kuyandikana maningi kugeledwe masusu. Nkabela wa kazumanana kulanga ng’anda koonse. Taa kali kuswiilila kuli

ndime. Nda kati, “Musankwa, Ndi yanda kuti uswiilile kuli Nce kanana.”

Kati, “Iiyi, munene.”

Elyo Nda kati “Ula tuyanda musimbi oyu na?”

Wa kati, “Iiyi, munene. Nda cita.”

Nda kati, “Ula tuyanda na?”

“Iiyi, munene. Nda cita.”

⁹⁷ Nda kati, “Lino, sa uli jisi busena bwaku mutola wamana ku kwata?”

Kati, “Iiyi, munene.”

⁹⁸ Nda kati, “Ncibotu Lino,” Nda kati, “Ndi yanda ku kubuzya cintucimwi. Nda kamvwa, ula beleka atala awa ali yeeyi PWA.”

Elyo wa kati, “Iiyi, munene.” Oko kutandila madollar aali kkumi abili mu mvwiki.

Nda kati, “Sena uyeeya kuti inga wakonzya ku mubambila zya kuponera?”

Wa kati, “Ndiyo cita zyoonse Nzye konzya kucita.”

⁹⁹ Elyo Nda kati, “Ee, eco cili kabotu.” Elyo Nda kati, “Lino, ino kuti wazwa a... Ino kuti walekelwa ncito eyi, mucizi? Uyo citaanzi, sena uyo inka kujokela kutala ku muunzi na, kuli baama, bataata?”

Waa kati, “Peepe, munene. Njo zumanana kukkala a nguwe.”

¹⁰⁰ Elyo Nda kati, “Ino, munene, kuti waba aa bana botatwe na bone, kakutakwe caku basanizya, alimwi kotakwe a ncito. Neinzi ncoya kucita, nku mu tanda na?”

¹⁰¹ Kati, “Peepe, munene. Ndiyo pengaana ncobeni. Tuyo cikonzya mu nzila imwi.”

¹⁰² Nda kalimvwa buniini. Elyo Nda kabona kuti wa kali ku mu yanda nconzyo, alimwi bakali kuyandana. Nda ka ba kwatanya.

¹⁰³ Mpawo Nda kalibuzya oko nkwa nkwa kamutola. Ii mazuba masyoonto, Nda ka buzya mukwesu, Doc, nko okuli. Wa kati, “Kwiinka kumusanza ku New Albany,” dolopo liniini kumusanza kwesu.

¹⁰⁴ Elyo kunselelo lya mulonga, oko nkwe Nda ka jisi lubulo lumwi lwa kabikkidwe, oko Nkwe kali kwiinka abuzuba cindi Ne—Ne kali sikulanganya ntambo. Aboobo cindi bamwi balombwana, boonse bakakkala kuzunguluka, kaamba kudana a zintu, Nda kali kunjila mu traki a kuselemukila ku mulonga a kukomba kuciindi eco, mukati omuya, a kubala Bbaibbele, kensi lya lubulo lupati oko nko bakali kubelekela zya butale. Kuli cikama ca myootokala iivumbidwe koonse okuya.

¹⁰⁵ Lino oyu mulombwana nkwa kainka kunselelo okuya akuyo lijanina imwi myootokala iivumbidwe koonse akumu

pangila citendeele muli ncico. Elyo wa kabwezede muteende a mabbatani akusekka.

¹⁰⁶ Mbangaye bazi bbatani iisekkwa kuti niinzi? Takukwe bana Kentucky okuno, mpawo. Ili, wabweza cibela ca kkadiboardi, wabikka kakusyonka ku caala muli ncico, kasiko kaniini. Elyo mpawo ku kasyonkela mukati a... Eyo nje bbatani isekkwa.

¹⁰⁷ Aboobo, ba kacibikka abusena boonse. Alimwi wa kainkide kutala kuya kubelekelwa butale kuyo mujania zintu zimwi, akubamba matantilo, akutantila. A kujana zibbokesi zya kaindil, akumu bambila tafule. Elyo Nda kayeeya, bumwi buzuba, "Njo unka kunselelo akuyo obona mbo bazwidilila."

¹⁰⁸ Kutandila myezi ili cisambomwe kakutaninga ba obo, Nda kakwatanya mwanamusimbi wa E.V. Knight ku mwanamulombe wa E. T. Slider. E. V. Knight, ngoumwi wa bantu bavubide kapati baliko ku Mulonga wa Ohio, a, weendelezya mafakitolii mapati koonse okuya, kubamba yaaya maanda akupangila zibela azimwi zimbi. Elyo—elyo Slider, E. T. Slider, ni kkampani ya misseenga a lubwelubwe, mbanan ba mabbilioneaya. Elyo Nda ka bakwatanya.

¹⁰⁹ Elyo Nda kujokela ku busena, nke cisleka kutandila ku mvwiki zyobile, a kwiinka kujokela katente akufugama aa pilo. Elyo zyoonse zya kusakatizya azintuzyoonse Nzye kasola kwiindamo, awafwi, kacita kwiindamo, kuyo kwatanya baabo banabukwetene! Elyo cindi ni bakayutuka, baa, ba kali... Aba banabukwetene bamwi basyoonto ba kaliimvi buyo mu kaanda kaniini kakaindi oko nko twa kajisi sofa niini a bulo bwakupeta, pele boonse baka kwatanisigwa kwiinda ku kusekelela komwe.

¹¹⁰ Elyo mpawo, buzuba bumwi, Nda ka yeeya kuti Nde elede kwiinka kunselelo akuyo swaya banabukwetena aba bavubide. Tiiba keelede akubeleka, ba mausyi babo bakali mamilioneaya, ba kali bayakilide muunzi mubotu. Mukasimpe, oyu E. V. Knight, kutala, okuno atala a cilundi, ima zjaluzyo zyamubalo nzya mweelo wa ngolida aa palesi yakwe mpati, aboobo inga mwayeeya kuti wakali muunzi uli buti ngo bakali kukkalamo. Tiiba keelede akubeleka. Ba kajisi Cadillac mbotu njo bakali kupegwa amwaka. Elyo buyo, bana biyo, alimwi ba kali jisi zintuzyonse nzo bakali kuyanda. Cindi Ne kainka kutala buzuba bumwi...

¹¹¹ Lino, obo Mbwe kazibilana a mbabo, umwi wa balongwe babo wakali mweenzuma wangu mubotu. Toonse twa kali kubaanga mbalongwe antoomwe. Elyo mbo mbubo Mbwe kazibilana, cindi niba kali kuyanda ndime kuba kwatanya.

¹¹² Aboobo Nda kainka kuyo baswaya. Nda kaimikila anze lya Ford yangu, anze, a kutanta matantilo. Elyo—elyo Nda ka imikila, aniini munsi loko, mpawo Nda kabamvwa. Elyo bakali kukwankwana ncobeni. Ba kali kuvwidilana bufwi umwi aumbi. Ba kainkide ku kuzyana. Waa kali musimbi mubotu maningi.

Alimwi waa kali kubaanga nguumwi wabaaba banamalelo babotu. Waa kali kubweza bulumbu bunji bwakuwina koonse okuya, akuwina imwi myootokala a zintu, nkambo kakuba namalelo mubotu. Mpawo Nda ka balanga, nkabela umwi wakali kkede ku kkona aumbi kuli limbi, kabakwankwanina musankwa umwi ngwa kali kuzyana awe, na musimbi umwi, cintucimwi.

¹¹³ Cindi ni Nda kalibonya, baka sotoka cakubinda loko akukwempana umwi aumwi aa cibuye, a maanza abo—abo aa cibuye, kabeenda kuboola kutozya kucitendele. Kabati, “Baa, wabonwa oko, Mukwesu Branham! Wa pona buti?”

Kati, “Kabotu. Mu pona buti nyoonse?”

¹¹⁴ Elyo, “Oh,” wa kati, “Nda—Nda . . . Twa botelwa loko. Embo na, oyandwa?”

Elyo waa kati, “Iiyi oyandwa.” Mwabona?

¹¹⁵ Lino, nywebo mwabona, uli mukusama cintucimwi citali cini. Lino, to konzyi kukasaalilwa ku mulilo wakapentwa pe, mbuli amwi mambungano aya amwi asoleka kupenta pentekoste, ku cintucimwi eco caka citika cuulu ca myaka yakainda na zyuulu zyobilo zya myaka zyakainda. To konzyi kukasaalilwa ku mulilo wakapentwa. Pentekoste nja kasimpe buyo mbuli mboya kabede kaindi. Mwabona? Inzya. I Mulilo uciloka asunu. Tii wakali mulilo wakupentwa pe. Walo Mulilo wa kasimpe.

¹¹⁶ Aboobo, balo, mbubonya buyo mbo bakabede. Mwabona? Inga—Inga nseyanda kupona boobo.

¹¹⁷ “Oh,” Nda kayeeya, “nywebo mulizi, kunselelo atala lya golonkolo okuya alimwi atala lya mulonga, nkooko aba banabukwetene bamwi nkoba golela.” Nda kayeeya, “Masiku aa Mujibelo amwi Nda kali kusobeleta kunselelo okuya akuyo bona mbo bakali kuzwidilila.”

¹¹⁸ Aboobo Nda, tombe ku busyu, atombe ku ovolosi ndeka samide. Nda kayeeya, “Ndi ba sobelele.” Nda ka sobelela ambali mbuli kuti Nda kali kulangalanga ma insuleta akapandulwa ku lulabo na cintucimwi, nkabela Nda kainda ku lubazu lwa luwaile lwa telefooni, intambo zya malaiti kumbali lya mulonga. Eyo mpaawo kwakali Chevrolet yakaindi, yaka liimvwi kumbele. Kutandila mwaka nikwaamana, Ne kazwaa kubakwatanya. Lino kwakali i—i . . . I citendele cakali jukide, alimwi Nda kali kukonzya kubamvwa kabaambaula. Aboobo eci cimvwika mbuli sikuupaupa, pele Nda kainka afwaafwi kweelede mane Nda konzya kuswiilila, kubona eco nce bakali kwaambaula. Kaimikila awo. Eyo Nda kali kuyanda buyo kuziba, kuli lwangui.

¹¹⁹ Nda yandisya kubuzya akuba masimpe kuteeti Ndi licizi kujatikizya Nce kanana. Eyo njenzila Nje cita kujatikizya Ijwi

lya Leza. Sa Bwalo Mbwini, nape Ta buli Bwini? Sena Uyo bamba Ijwi Lyakwe, na sa Ta bambi Ijwi Lyakwe? Ta bambi Ijwi Lyakwe, nkokuti Tali Leza. Mwabona? Ula bamba Ijwi Lyakwe, Ngú Leza. Mwabona?

¹²⁰ Elyo aboobo Nda kali kuyanda kubona mbuli mbo bakali kuzwidilila. Elyo Nda ka sobelela ambali, cabuteteete loko. Nda ka mumvwa kati, “Oh, oyandwa, Nda kali kuyanda kukuulila elyo, kapati nconzyo.”

¹²¹ Waa kati, “Lino, langa, okalungukaamoyo.” Waa kati, “Eeli dilesi lili kabotu.” Waa kati, “Baa, eli lili kabotu.” Kati, “Nda cilumba eco. Pele bona yebo...”

¹²² Nda ka sobelela kunze, aboobo Nda kakonzya kulanga kwiinda mu lwaanzi, oko citendele nko cakantwa kujuka okuya mu mootokala uuvimbidwe koonse. Elyo ngooyo mbwa kabede, kakkede mukati omuya, anguwe aa mabelo akwe; a kuboko kwakwe kuzunguluka nguwe. Alimwi waka jisi yomwe ya ngowani ezi zyakaindi zivwabama, alimwi ka bikkide kapulo kaniini, kiizapula aansi, aatala, akusomona cceki lyakwe lya kuvozya, muli njiyo. Wa—wa kali libikkide aa tafule. Kati, “Kunji *obu* nkwa zyakubelesya a zilyo. Kunji *obu* nkwa insualensi. Alimwi kunji *obu* nkwa mootokala.” Lino bakakakilwa kubamba mamanino amubandi wabo. Kuboola kuziba kuti, wa ka bwene dilesi liniini kutala mu mpulungwido, wa kali kulilanga kwa mvwiki zisyoonto, lyakali kuulwa dollar lyomwe na cintucimwi. Wa kali kuyanda ku lyuula. Kati, “Ee, oyandwa, inga waboneka kabotu loko muli ndilyo.” Alimwi wa kati... .

¹²³ Waa kati, “Pele, oyandwa, Ndili—Ndili jisi dilesi. Nse—Nse yandikani ndilyo.” Wabona? Lino oyo namalelo muniini... .

¹²⁴ Elyo Nda kaleka, akulanga langa. Nda kakonzya kubona i—i ngazi atala lya ng’anda imbi. Nda kaima awo akulanga, kwa maminiti masyoonto. Nda kayeeya, “Nguuli muntu uvubide?” Nda kayeeya, “Ikuti na, Bill Branham, ikuti na uyanda kusala busena, nkookuli nkonga wainka?” Kuli ndime, inga Nsi indatola eco cintu cibotu okuya atala lya cilundu. Inga ndabweza eci ciimo cili kunselelo okuno, mbuli sikubamba wini wa muunzi, muntuumwi oyo waka ndiyanda a kukkala andime, muntuumwi wakasola kubamba muunzi; nkabela kutali kukuzuuya zintuzyoonte, zya kulisakatizya zibotu zyeebeka; a muntuumwi oyo wakali anduwe, wa cibeela cako.

¹²⁵ Oyo ujatilila kuli nduwe lyoonse, nzila mbo kwakabede. Umwi waka sala musimbi weebeka, aumbi waka sala ciimo. Lino, eyo nje nzila ilikke njo konzya kusala. Lutaanzi, koyandaaula ciimo; alimwi mpawo, ikuti na ula mu yanda, ncibotu.

¹²⁶ Amubone, Adamu wa Leza mutaanzi taka jisi kulisalila kuli koonse, ku mukaintu wakwe. Ta kajana kulisalila. Leza waka

mu bambila buyo omwe, alimwi ta kamusala. Aboobo tu jana kuti waa kamu leesya kuzwa ku Ijwi lya Leza. Ta kaikombela nkani. Ta—ta—ta li mbuli ndinywe a Ndime. Ta kajisi kulisalila. Elyo alubo, kwiinda mu kucita ceeco, waa kamu leesya kuzwa mu busena bwakwe bululeme bwa kuba mwana wa Leza. Elyo waa kakucita kwiinda kukumu tondezya nzila ya kupona ya busyaasunu, cintucimwi eco ncobata keelede kucita ncobeni. Pele ciimo cakwe caka tondezya kuti taa kaluleme. Makanze akuyanda kwakwe zyakali lubide buya. Aku musungilizya, kwiinda ku kubuzyabuzya kwakwe, kuti waa jana oyo mumuni mupya wa busyaasunu, walo wakaimpene ku Ijwi lya Leza, yakali nzila mbotu ya kupona.

¹²⁷ Elyo mbongaye banakazi sunu, ka kunzila imbi, baalumi, abo bakonzya kukwela mwanakazi uli kabotu kuzwa kuli Leza, na kukwela mwaalumi uli kabotu kuzwa kuli Leza? kwiinda ku kusola ku mwaambilia kuteeti, “Obu bukombi, nywebo nobasankwa ba Pentekoste, obo bukombi,” ba lati, “oh, eco ncianza cakaindi, mutu wa mizeezo ya ziyanza zyakaindi, uta syomi eco.” Ncibotu wa komba canguzu kotaninga kwata musimbi oyo. Ta ndikwe makani obo mbwali mubotu. Ncintu ncionya ku mwaalumi.

¹²⁸ Waa kamusungilizya kuzwa ku luyando lwa Leza ku mucitya cintucimwi eco ncata keelede kucita, a, kwiinda kuli ncico, cakaleta lufu ku mukowa wabantu oonse. Nke kaambo Bbaibble lila mukasya ku yiisya, nekuba kukambauka, nekuba kukutauka zya Ijwi lya Leza, mu ciyanza cili coonse.

¹²⁹ Ndi lizi, nobacizi, bunji bwanu mwaamba kuti, “I Mwami wakandiita ku kambauka.”

¹³⁰ Ta ndiko kazyanya a ndinywe. Pele Ndila mwaanbila, Ijwi lyaamba kuti mweelede kucicita. “Ta kaiisyi pe, nekuba kuba a bweendelezi, pele kuumuna wii.”

“Ee,” nywebo mwati, “Mwami waka ndaambila ku kucita.”

¹³¹ Ta ndizumbauyi ako nekuceya. Sena mwa kamvwa Mulumbe wangu busiku bumwi uujatikizya Balamu? Balamu waka jana muzeezo wa Leza mutaanzi waka tonkomene kuteeti, “Uta ci citi.” Pele waka zumanana kulyeena kusikila kumalekelo Leza waka mwaambilia kuunka kuyo cicita.

¹³² Leza inga wakuzumizya kukambauka. Ta ndaambi Ta kacita. Pele ta kweendelani mabambe mataanzi aa Ijwi Lyakwe. “Nkambo weeblede kweendelezegwa, mbuli mbo waamba mulao.” Nca bwini. Nkikaako, taelede kucicita.

¹³³ Lino, mubone alubo obo nabwiinga wakunyama mbwatondezya wa kumuuya. I Ijwi lilaamba, kuti, “Waa kabambilwa mwaalumi, alimwi mwaalumi taka bambilwa nguwe.”

¹³⁴ Lino Ndiyo kanana, elyo baa, mu maminiti masyoonto, ali Nabwiinga wa Kristo, pele Ndi soleka kumu tondezya ntalisyo ancico.

¹³⁵ "Mwanakazi waa kabambilwa mwaalumi, a kutali mwaalumi ku mwanakazi." Ako nkekaambo, kunsi lya milao yakaindi, nkuti maali akali kuzumizigwa. Amulange Davida kakkede anselelo awo a bamakaintu bali myaanda yosanwe, a Bbaibbele lyakati, "Wa kali muntu wakali kuyandwa kuzwa ku moyo wa Leza." A bamakaintu bali myaanda yosanwe, a Solomoni abali cuulu, pele takwe umwi wa banakazi abo wakali kukonzya kuba a mulumi uumbi.

¹³⁶ Kabweze teepu yangu a *Lukwatano A Kulekana*. Kutti, atala a cilundu caku Tackson, okuno kutali ciindi cilamfu cainda, Nda kali kutala okuya kukomba kujatikizya nkuko. Ba kamwaisya basicikolo, ku zoebela Musumpululo wa Mulilo kuzunguluka cilundu aaku kambizi, koonse a koonse, mujulu aansi. Bantu bakokuno bali cizi, okuya, a Kuu bona; alimwi Wa...cindi Na kandaambila Bwini bwa yeeyi mibuzyo ya lukwatano a kulekana. Iktutu na kuli bbazu limwi litola nzila *eyi*, aumwi kutola nzila *eyo*, kweelede kuba Bwini kubusena bumwi. Kumane ezyo Zinamatizyo zili Ciloba, Wa katondezya obo bwakali Bwini bwa ncico.

¹³⁷ Amubone, lino, ta kali kukonzya kuba pele mulumi omwe, nkaambo, "Mwanakazi wakabambilwa mwaalumi, a kutali mwaalumi ku mwanakazi." Abo boonse banakazi bali myaanda yosanwe bakali buyo bamakaintu ba Davida, alimwi cakali cikozyanyo. Cindi Kristo aa kukkanla aa Cuunocabwami mu Milleniamu, Nabwiinga Wakwe takabi muntu omwe, pele kuyooba makumi aazyuu, Nabwiinga, boonse muli Omwe. Elyo Davida waka jisi bamakaintu banji, mbuli bagame, pele boonse biyo babo antoomwe bakali mukaintu wakwe. Mbuli Mibili oonse wa basyomi ngu Nabwiinga wa Kristo, nkambo Ngo Nguwe, mwanakazi. Wa kali Mwaalumi. Lino, twa kaanzilwa Kristo. Kristo ta kaanzilwa ndiswe.

¹³⁸ Nce ncico ncotu sola kucita sunu mu mabbuku esu aziyyo aakubala, nku sola kubamba Ijwi (ilili ngu Kristo) ku tweeela, mucibaka cakuti swebo tuli bambe tobeni kweelela ku Ijwi. Olo ndolwandaano.

¹³⁹ Cindi mwaalumi asala musimbi umwi kuzwa mu mukwasyi, ta elede ku yaamina ku kweebeka, nkambo kweebeka nducengo. Alimwi kweebeka, kweebeka kwanyika yabusaasunu, mbu bwa dyabolosi.

"Oh," Nda kamvwa umwi kubusena okuya, kutti "ko cenjela okuno, omukambausi!"

¹⁴⁰ Nda amba kutti ezi zintu atala a nyika eyi, ezyo zitegwa bweebesi, nzya dyabolosi ncobeni. Ndiyo citondezya kuli ndinywe. Mpawo, mumuni wa bukanazi obu, atu lingule Ijwi lya

Leza lisetekene, kutegwa tubone na kuli luleme na pe. Alimwi nobamwi nobanakazi muyanda kweebeka kapati! Amubone nko kwakazwida. Ku matalikilo, tu jana kuti Saatani wakali kweebeka maningi kusikila wa keena Baangelo. Alimwi wa kali Angelo wakali kweebeka kapati wa boonse babo. Katondezya, kuli muli dyabulosi. Tusimpi tulati, Solomoni wakati, “Bweebesi mbwa buyo.” Mbo mbubo. Cibi mbweebesi. Masimpe, mbo bubede. Bula kwelelezya.

¹⁴¹ Ndi yanda ku mubuzya, a kwaamba cintucimwi awa kuli ndinywe. Ndi yanda mubona, maminiti masyoonto. Ku misyobo yoonse ikozyenye mu nyika, bayuni, banyama, tu jana kuti ku buumi bwa munyama, zyoonse kunze lya muntumsi, walo mweenze oyo weebeka, akutali muzyazi. Nkaambonzi obo? Amulange ku... Amulange munyama diya, i—i diya mweenze mupati mubotu a meja akwe, aka amunyama diya mweenze muniini. Amulange ku i—i nkukunseke, inini, nseke yatubalabala, a mukombwe wa mapepe mapati. Amulange tuyuni mukombwe a tuyuni wanseke. Amulange ku dakisi lya musokwe a liseke. Mwabona? Alimwi takukwe musyobo uukozyenye mu inyika, oyo wa kabambwa, oyo uukonzya kucenga akuubauka kuyaansi mbuli mwanakazi.

¹⁴² Lino, mucizi, uta imikili akuzwa anze. Ko lindila buyo kusikila tumvwe mamanino Aceeci. Wabona? Wabona?

¹⁴³ Takukwe cintu, taakwe muzyazi kunze lya mwanakazi, ukonzya kuba mwaamu. Yebo waita mubwa “a muvuule,” yebo wiita ngulube kuti “i—inzyazi” pele, mukulilemeka, zijisi kulilemeka kunji kwiinda cisela ca basizipekupeku abo baliko kumasena aya. Ta bakonzyi kuba cimbi kunze lya balilemeka kabotu.

¹⁴⁴ Elyo mwanakazi ngo nguwe waka cincwa, nkambo ka lusandulo. Mbo mbubo. Mubone oko bweebesi nko bu mutola? Lino, nkekaambo ako, sunu, tu jana kuti banakazi bali mukwiindila mu bweebesi. Amu bwewe Pearl Bryan, mwakabona kale cifoto cakwe na? Weelede kuba muna America mubotu maningi. Takukwe mwana wacikolo uzwa ku cikolo cili coonse pele oyo inga wamubikka kunembo lya sole. Sena mwa kalizi kuti ceelede kuba mu nzila eyo? Sena mwa kalizi kuti Bbaibbele lyaamba kuti eyo nje nzila mbo ciyooba?

¹⁴⁵ Sena mwakalizi kuteeti kuwa kwa kaboola kwiinda ku mwanakazi ku makankilo? A kuwa... I mamanino ayo golela mu nzila njiyonya, banakazi kaba boola mu bweendelezya akulela baalumi, azimwi zimbi. Mulizi Lagwalo lwaamba obo na? [Mbunga yaamba, “Ameni.”—Mul.] Nywebo mulizi, buzuba obo mbwasama cisani ca mwaalumi, akugela masusu akwe, zyoonse ezyo zintu ziliimpene ku Ijwi lya Leza. Alimwi sena mulizi kuti wiiminina mbungano? [“Iyi.”] Cindi mwa langilila eco banakazi nco bacita, muyo bona eco mbungano ncoicita. Mbo

mbubo ncobeni. Lino, lino, obo mbwini buyo mbuli Ijwi ly a Leza mbo lili bwini.

¹⁴⁶ Takukwe cizyazi cimbi cibambidwe cikonzya kuubauka mbuli mwanakazi mbwa kozya. Elyo nekubaboobo, kwiinda muli ceeco, mu kubamba kuzwa- . . .

¹⁴⁷ Ta kalimo mu bulenge butaanzi. Zyoonse nzyazi zimbi zili mu bulenge butaanzi: bayuni, bazingili a nseke; banyama, bazyazi a beenze. Pele, mu buumi bwa bantunsi, Leza wakabamba biyo mwaalumi, alimwi Wa kagusya kuzwa kuli nguwe. Elyo mwanakazi ncipangulule ca mwaalumi, nkaambo Leza ta kazibya cintu mbuli ceeco. Amulingule Magwalo. Mbo mbubo ncobeni. Leza, peepe, munene, mu bulenge Bwakwe butaanzi. Waa ka bikkidwe aabusena alya.

¹⁴⁸ Pele ikuti na wakonzya kulijata kabotu mwini, ino mbulumbu bupati loko obo mbwa jisi kwiinda mwaalumi. Waa bikkwa ku busena bwaku solekelwa. Kwiinda muli nguwe kwa kabooola lufu. Uli amulandu wa lufu loonse. Pele mpawo Leza wakanyona a kubelesya umwi kuleta Buumi alubo; kaleta Mwana Wakwe kwiinda mu mwanakazi, oyo uuswiilila. Pele mubyabi ngu i-i inda kubija uliko; takukwe cintu cikonzya kuubauka.

¹⁴⁹ Kaini, mwana wa Saatani, kayeeya kuti Leza wakali kutambula bwuebesi. Ula cita asunu. Kaini wakali mwana wa Saatani. "Oh, lino!" mwa ti. Ta tu koinka kusakana ali ceeco, pele amu ndileke buyo ncisitikizye kuli ndinywe. I Bbaibbele lyaamba kuti wa "kali wa oyo wa mubi." Aboobo, eco cila cibamba. Yaa. Lino, wa kali mwana wa Saatani. Elyo wa kayeeya kuti, kuleta cipaililo aku cibamba kweebeka ncobeni ku kukomba, kuti nce ncico Leza nca kali kuyo lemeka.

¹⁵⁰ Bala yeeya, yeeya cintu nciconya asunu. Masimpe. Eci, "Twa kayaka buyake bupati. Tuyo oba tubungwe tulemu. Tuyo oba buyake bwiinda kukomena a bantu basama kabotu kwiinda, bapaizi bakaiya kabotu loko abamvwisywa kabotu." Ziindizimwi Leza uli kule loko kwa mamaile ali mamilioni aali kkumi kuzwa kuli ncico. Mbo mbubo. Nekubaboobo ni mbungano.

¹⁵¹ Aboobo, ikuti na Leza ulemeka buyo bukombi, kusinizya, cituuzyo, Kaini wakali mbubonya buyo mbuli Abela. Pele cakali ku ciyubunuzyo, kuti waka mvwisya kuteti taakali maapele ayo nge bakalya bazyali bakwe.

¹⁵² Ndila amba cintucimwi awa eco citali mvwisyi kabota ku mukutausi, pele Ndila caamba, nokuba. Ndila mvwa bamwi bambi kabaamba zintu, obo mbo baamba kudana kusyoonto. Nse cikanzi. Nda amba ceeci, nekuba, "Ikuti na kulya maapele kwakacitya banakazi ikuziba kuti bakali azinswe, ncibotu twa vozya maapele alubo." Mwabona? Mwabona? Uh-huh. Mundi jatile kuli ceeco, pele obo kutegwa ciyo cinca. Nda mwaanga awa lino, a kukanana kujatikizya banakazi, azimwi zimbi. Ndi—

Ndi—Ndi yanda kumu pumuzya aniini, cintu citobela ceelede kusika. Lino, amubone, nywebo... Ta kali maapele. Tu lizi obo.

¹⁵³ I mbungano mboyaba mu mazuba ano, antoomwe akuzwidilila kwayo, mbuli kuzwidilila koonse kumwi kwa kabambwa aamuntu, iyabuba yasaayaansi. Ba soleka kubamba mbungano yasaayaansi, kwiinda ku kukwelelezya zifwanikiso a ngazi zipati. Nkabela ncibi loko bana Pentekoste baka njila mu cigelo eco. Inga mwaba kabotu a nsaka, kunselelo lya kkona a Muuya wa Leza kau muzungulukide. Pele nywebo musoleka ku lyeezyanisa a bamwi babo, nkaambo mwaka libunganya. Eco nce cakacitya eco. Mwabona? Mambungano asoleka kuba asayaansi.

¹⁵⁴ Elyo amuyeeye, mbuli muntu mbwa konzya kuzwidilila ku sayaansi, uli mukuli jaya mwini abuzuba. Cindi na kaanza musili wa ntobolo, langa eco ncowaka cita. Cindi na kaanza mootokala, ula jaya banji loko kwiinda musili wa ntobolo mbo bucita. Lino waka lijanina bbomba lya haidrojini. Libuzya eco ncayo cita aleelyo? Yaa.

¹⁵⁵ Elyo mboibede ayalo mbungano, mbuli mbi soleka kuzwidilila kwiinda ku sayaansi, kwiinda ku mabambe akabambwa aamuntu, amutola tola kule loko kuzwa kuli Leza, akuya mu lufu, kunji kwiinda mbo kwakabede ku busena butaanzi. Mbo mbubo. Uta sali mbungano yako mu nzila njiyonya njo kacita mukaintu wako. Mwabona? Eco sayaansi nciyaka mu citila cakali cigambyo, pele ncibotu wa tantamuka kuzwa ku mbungano yako nkambo ka ceeco; wa kabamba misila, mapauda, azintu ezi zyonse zimbi. Kosala kwiinda ku ciimo ca Ijwi Lyakwe.

¹⁵⁶ Lino atwe ezyanisye nabwiinga wakunyama wasunu ayeeyo iitegwa mbungano nabwiinga ya sunu. Kweezyanisa mwanakazi, uyo kwatwa sunu.

¹⁵⁷ Lino, amulange eco sayaansi ncoya mucitila. Ula zwa, lutaanzi, a masusu akwe kaageledwe, abu bwa mabambe aya amwi aamasusu akwa Jacqueline Kennedy, mwabona, na cintucimwi mbuli ceeco. Elyo mulizi eco Bbaibbele nco lyaamba na? I Bbaibbele mubwini lipa mwaalumi, ikuti na ulayanda, inguzu zya kumuleka mu cilekanino, ikuti na waa cita eco. "Walo mwanakazi uubaukide, oyo uyogela masusu akwe." I Bbaibbele lyaamba obo. Yaa. Tii mwakazi obo? Huh? Oh, inzya! Nda kambaula loko mu California kuli ndinywe kutaba eco. Mbo mbubo. Oh, inzya! Mbubotu nzi mbo cicita kuli ndime? Bala cicita, nokuba. To konzyi kubweza ngulube aku cinca zina lyayo, kuli bamba kabelele. Amubone.

¹⁵⁸ Muyo ndisulaika kwamana oyu, pele muyo buziba Bwini. Mwabona?

¹⁵⁹ Amulange. Atu ceezyanisye. Ngooyo waa boola a misila yoonse minji, cintucimwi eco ncatabede, nabwiinga

wabusyaasunu. Kosanza busyu bwakwe, uyo mutija, ambweni. Uyo kuyoosya calufu, gwisya zyoonse ezyo zintu kuzwa kuli nguwe. Aboobo mbubonya mbo ibede mbungano kijisi mbele impati, ya Max Factor wa Iwiiyo lumaninide Iwabukombi. Uh-huh. Bobilo bajisi i—i bweebesi, busyu bwa kubeja ali mbabo, bubotu bwa kabambwa aamuntu akutali bubotu bwakabambwa aa Leza. Kutali ciimo cinji muli naba omwe.

¹⁶⁰ Amulange, mbubonya mbuli Saatani, kunji kweena kuli nkuko, koezyanisa nabwiinga wabusyaasunu a nguwe lino: uusama zigonkolole, uusama tulukwe, uugela masusu akwe, uusama zisani ziboneka mbuli zya baalumi, a kuswiilila ku mweembeli oyo waka mwaambilila kuti cakali luleme. Ngu sikucenga. Uyo cipengela eco ku masena ali kutala. Mbo mbubo. Kucita ceeco ku lucengo, kuba cintucimwi mbwa tabede.

¹⁶¹ Eyo nje nzila mbungano mboicita, kujana mapati ma DD, Ph.D., LL.D. Aboobo mulaamba, "Mwembeli wesu uli *obu, obo*, a *bumbi*," ambweni kutaziba buyo Leza kwiinda muna Hotentoti mbwazi kujatikizya busiku bwa Egepita. Obo mbo mbubo. Yaa. Luzibo lumwi lwa seminar ilwa Iwiiyo zya bukombi okuya, nkabela kutaziba Leza kwiinda cimwi.

¹⁶² Mbungano yabusyaasunu a misila yayo ya Iwiiyo Iwabukombi, hmm, kulekela banakazi babo boonse a bulemu bwabo kabugeledwe, kwiinda kuli bamwi ba ricky a mweembeli oyo ngo bajisi, mbuli Jezebeli kuti kwakali omwe. Masusu ageledwe, zigonkolole, misila, konse kubambidwe mu kubotelwa kwa Iwiiyo Iwabukombi, nje nzila mbungano mbo iimvwi. Yaa. Pele ciimo cakwe ca kumuuya cili kule ku kuba sikubamba muunzi oyo Jesu Kristo ngwayo boolela tambula.

¹⁶³ Ikuti na kufumbwa Munakristo inga wakwata mwanakazi mbuli oyo, citondezya kuti wa kawa kuzwa ku luzyalo. Kubotelwa kwakwe kuli Leza a kubotelwa kwakwe kwa muunzi, obo muunzi mbo weelete kuba, nkule loko, cindi asala mwanakazi mbuli oyo. Peepe, munene. Taa kaelei ncobeni kubotelwa kwa Munakristo. Ciimo cakwe ca kumuuya mbube bwaansi loko, kufwa, mu bubotu bwa tubungwe acisu si ca nyika.

¹⁶⁴ Mpaawo ncobeni mbungano mpo iimvwi sunu, kusambala ciimo cayo ca Ijwi lyakapegwa kuli Saatani, ku bukombi bwa kabambwa aamuntu bwasyaansi. Cindi, waa jisi nguzu, mbuli mbungano ya Leza, zyaku kkala a Ijwi lya Leza akuba a Muuya Uusalala kau beleka akati, ka uswaanganya Mubili antoomwe ku Ijwi a luyandisylo lwa Leza. Mubusena bwa ceeco, waa sambala bupati bwakwe, mbuli Esau, akubweza kabungwe, kumulekela kucicita, kufumbwacintu nca akali kuyanda kucita, nguzu, kuba biyo simpuwo mbuli banyina mbobaka cita ku Nicaea, Rome. Ijwi lya Leza!

¹⁶⁵ Oh, obo mbo ca njila mu cilawo ca Pentekoste yesu! Nci byaabi loko, pele ca kacicita.

¹⁶⁶ Amubone, aniini buyo, siite mu mbungano ya Katolika. Ulya mwanakazi, kutegwa abe siite, akubweza civumbyo eco cisyaalizyi, uuli sambalidwe ncobeni kuli yeeyo mbungano. Uli (buntu, mubili, a muuya) ncikono ca mbungano eyo. Taa cikwe muzeezo wakwe mwini. Ta konzyi kuujana, cindi abweza civumbyo eco cisyaalizyi, taakwe luyando lwakwe mwini. Mwabona abusena awa, kuti Saatani ubabamba kuba basilweeno bakwe, mbuli bwini.

¹⁶⁷ I Mbungano iini ya Kristo, Nabwiibga, ili sambalidwe kuli Nguwe aku Ijwi Lyakwe lya cisyomezyo, kusikila oyo tuyeeeyo wakali muli Kristo uli muli ndinyewe. Ino ndwaandaano!

¹⁶⁸ Elyo sunu tu jana, kuti, mbungano yabusyaasunu, mbungano yanyika yabusyaasunu, mbungano yanyika yabusyaasunu, mbungano ya nyika ya busyaasunu akwalo kuti Mbungano ya kumuuya zyobilo zya kamisigwa, kuti zikazyale bana.

¹⁶⁹ Kumwi kwayo, nkuzyala kwatubungwe, kuyo opa, kumwi ku...buzuba, ku...mazuba aya, ku Kkanso Yanyika ya Mambungano, eyo iyoozyala sikulwanakristo ku inyika, kwiinda ku kabungwe. Obo Mbwini ncobeni. Mbweni inga Nsi kaponi kuyo cibona. Ndila syoma Ndiyo cita. Pele, nywebo nobantu baniini, kamuyeeya kuti mwaka mvwa mukutausi kaamba eco. Kuti kumalekelo ciyo gola. Elyo eco ncaando ca munyama, cindi yaakupanga eyo Kkanso Yanyika iya Mambungano. Nkabela uyo tumbuka mwana wakwe mulombe, sikulwanakristo.

¹⁷⁰ Aimbi ili mitide kwiinda ku Ijwi lya Leza alimwi liyo zyalala Mubili, Mubili uumaninide wa Jesu Kristo, uuli ngu Nabwiinga. I Mubili wa Kristo tau ninga zulila pe. Mbangaye bazi obo? Ii mwaalumi a mwanakazi bali bomwe. Alakwe Kristo Mubili omwe, Ijwi. I Nabwiinga uyooba Mubili oyo oonse. Elyo bobilo, antoomwe, babamba Mubili omwe alubo. Mbili Adamu mbwa kabede kumatalikilo: mwaalumi, mukaintu wakwe, mbamwi. Lino, Walo, Nabwiinga wa bwini, aboobo mbwa kasambalwa kuli Nguwe, kuti Taa cibelesyi limbi muzeezo Wakwe mwini. Muzeezo Wakwe, mubwini, nduyando Lwakwe, a luyando Lwakwe ndi Ijwi Lyakwe.

¹⁷¹ Lino amulange uutegwa nabwiinga wakasalwa aamuntu, akweezyanisa wakumuuya kuli wakunyama sunu, Jezebele wa sunu ulowedwe kuli Ahabu wakwe, bweebesi bwa Max Factors, zintuzyonse. Amulange ku mbungano, nzila njiyonya, pele sibwaamu ku Ijwi lya Leza muumi; tubungwe tupati, mayake mapati, mali manji, kuvolu kupati, zyoonse zyaka sambalwa. Baalumi baimvwi mu cikambaukilo kuzumizya ceeco kuti cili luleme,aku balekela kwiinda kuli ncico. Lucengo buyo, kwa mana. Ninconzyo Mbukkalo boofweede bwa Mbungano ya Laodekiya, mbubonya buyo obo Bbaibbele mbo lyaamba

kuti buyooba. "Kati,'Ndili vubide. Ndili kkede mbuli namalelo. Taakwe cintu nce bulide.' 'Elyo to zyi kuti uli mucete, ulisampukide, moofu, upengede, ula cinswe: elyo to cizy." Ikuti na eco tali MBUBOOBU MBWAAMBA I MWAMI, Ciyubunuzyo 3, Nse na Ci bala. Mbombubo mbwa bede, elyo ta cizy! Amu ciyeeye.

¹⁷² Ikuti na waambila mwaalumi na mwanakazi, mu kagwagwa, abo bakali basicinwe kumaninina, aku baambila kuti bakali aciswe, elyo ba kati, "Kolanganya ku makani ako," baa, kuli kunyongana kuyeyya abusenabumwi. Kuli cintucimwi cakalubila mu mizeezo yabo.

¹⁷³ Elyo cindi wa konzya kubala Ijwi lya Leza, bo bantu mbo beeleder kucita, aloolu lubbizyo lwa Muuya Uusalala ndo tujisi sunu, alimwi, bantu, baa, bala kulanga mbuli kuti ulinyongene. Wa baambila: "Yebo uye . . ." Be elede kuzyalululwa. Be elede kusyoma Bbaibbele.

¹⁷⁴ Ba lati, "Ayo akali mankwankwalizya aba Juda, a myaka yakainda. Mbungano yesu ili jisi nzila." Upengede, usampukide, moofu, sicinswe, akutasola akwalo ku ciziba. Ino ii . . . Lino Bbaibbele lilaamba kuti nce ciimo ncoba njila.

Mbobuti musinsimi wa kasimpe mbwa soleka kwiimpya ku cibona? Ta ndizi.

¹⁷⁵ Kudilikila moonya mu mambungano esu oonse, kulikoonse. Amu cilange buyo, mu bweende buyo bwabusyaasunu. "I sikuvuula mupati abana basimbi," ba Ciyubunuzyo 17, kupa njiisyoyakwe ku bantu "bacete, boofu, bapengede" balwiyo lwabukombi lwiimpene ku Ijwi lya Leza. "Elyo muli nguwe baka jana myuuya ya bazike, ya baalumi a banakazi ya—ya koonse." Mucibaka caku kwelelezya bantu . . .

¹⁷⁶ Kristo ula simpikizya Ijwi Lyakwe, eelyo likwelelezya bantu. Ta kwelelezyi bantu ku mambungano ayo aka kwelelezegwa ku tubungwe tupati a zyakucita zipati, akulilemeka bumwi kulemu ncobeni a zintu zya lupaale zibotu. Pele Ijwi lya Leza likwelelezya Nabwiinga wa Kristo.

¹⁷⁷ Lino amubone. Cila botelezya ku—ku ziba obo kuti—kuti mbungano isoleka ku kwelelezya ku pakamana kwa bantu kwiinda ku zikobela zibotu a makkwaya asamide, a banakazi bageledewe masusu amasyu apentedwe misila. Elyo bayeeya . . . A kwiimba mbuli Angelo. Kubeja mbuli dyabulosi, kwaandaukaa koonse masiku kuya ku kuzyana mbuli, kuta yeeya kujatikizya ncico. Eco nce ncico ncobayeeya, "Cili kabotu. Eco ncibotu." Pele, nywebo mwabona, oko nkubambwa bubeji. Elyo talili Ijwi lya Leza.

¹⁷⁸ Kucindi, Nabwiinga wini nakwelelezya ku pakamana kwa Leza, kwiinda ku kubamba Ijwi Lyakwe. Lino amubone. Lino atu bone Kristo.

¹⁷⁹ Nywebo mwati, “Ee, lino, lindila aniini, ino kujatikizya buboto obu mbo kanana?”

¹⁸⁰ I Bbaibbaile lyakati, muli Isaya 53:2, kati, cindi Jesu nakaboola, “Kwaanyina buboto ali Nguwe, obo mbo twa keelede ku Mu yandila.” Mbo mbubo? [Mbunga yaamba, “Ameni.”—Mul.] Kwaanyina buboto. Ikuti Na kaboola mu buboto bwa inyika, mbuli mbwabede Saatani sunu, bantu inga bazuzaana ku Mu zunguluka aku Mu tambula mu nzila njeba cita mbungano sunu. Ni baka Mu syoma, ku Mu tambula, mbuli mbo bacita Saatani sunu. Masimpe, ni bakacita. Pele Ta kaboola mu musyobo oyo wa buboto, pele lyoonse Ula boola mu buboto bwa ciimo. Okuya, Kristo tana kali mubotu, mulemu, wanguzu, Mwaalumi uzuunyene. Leza tasali musyobo oyo pe.

¹⁸¹ Nda yeeya ciindi cimwi musinsimi waka inka kutala ku—ku kusala mwaami, ku bamba mwami kuzwa ku mwanamulombe wa Jese, kuyo bweza busena bwa mwaami uumbi, Saulo. Elyo aboobo Jese waka muleta, mulombe wakwe, mupati, mubotuloko mulemu. Wa kati, “I musyini uyo boneka kabotu, atala aa mutwe wakwe.”

¹⁸² I musinsimi wa kainka kuyo tila mafuta ali nguwe. Wa kati, “Leza wa mukaka.” Alimwi Wa ka kaka boonse babo, kusikila wa kaboola mulombwana muniini, wa makuko adiiemene, uboneka kugalankana. Elyo wakatila mafuta ali nguwe, alimwi wa kati, “Leza wa musala.” Mwabona? Tula sala ku kubona. Leza ula sala ku ciimo.

¹⁸³ Ciimo, takukwe nekwakali wa ciimo mbuli Jesu Kristo. Cila pona muli nduwe aku Mu zibya. Twa bona nca bwini. Ta buli buboto bwanyika Bwakwe obo bukwelelezya Nabwiinga Wakwe. Nciimo Cakwe, ciimo ca Mbungano, eco Jesu nca yandaula; kutali oko kuli mayake mapati, kuli tubungwe tupati, oko kuli bumemba bunji. Wa kasyomezya kuyo swaangana oko kuli bobile na botatwe babungana antoomwe. Nincobeni. Oko nko nkuko musyomi wakasimpe nkwa yaamika bulangizi bwakwe, mpaa Ijwi lya Leza kali simpikizigwa mu Bwini, obo mbolibede. Kusala kwiinda ku Ijwi Lyakwe, kutali nkamu iiyanda zyanyika. Bala cisulaika eco.

¹⁸⁴ Ta cigambyi waa kalekwa kuli Nguwe, nkaambo wa kaimpya ciyubunuzyo Cakwe, alimwi ta cijisi. Ta mubikkili maanu, nzila nja lilemeeka a kucita, a obo kunji kwa zintu ezi zyanyika nzya jisi.

¹⁸⁵ Walo ulangila ciimo cakwe, ciimo ca Kristo. Lino, asyoonto buyo lino. Nce ncico. Ula sala Nabwiina wa kutondezya ciimo Cakwe, kuli eco mambungano abusyaasunu ncaa impya bubambe Bwakwe—Bwakwe okuno, mamaile ali milioni, nkaambo ba kaka Ceecei kuba Bwini. Aboobo mbobuti mbo cikonzya kuba? Lino, Ula ngila buzuba bwa Nabwiinga oyo ku kubumbwa, Bahebrayo 13:8, mbubonya buyo Mbo cakabede,

mbuli Mbwa kabede. We elede kuba mubili Wakwe nguonya, mafuwa ngaonya, Muuya nguonya, zintuzyonse nzyoonya, mbubonya buyo kuyakwa, alimwi balo bobilo mpawo bali bomwe. Kusikila mbungano yaba booboo, tabali bomwe. I ciimo Cakwe, Ijwi, lya bukkalo obu, lyeelede kubumbwa. We elede kubumbwa mbuli Nguwe mbwabede.

¹⁸⁶ Lino, mu kujala, Ndi yanda kwaamba kaambo Nce wambila zintu ezi, alimwi Ndila—Ndila jala. I busiku bumwi, kutandila thrii okuloko kuseeni, Nda kasinsimunwa.

¹⁸⁷ Nda bwezwa uli onse wanu kwiingula oyu. Sa Nda kasola kumwaambila cili conse mu Zina lya Mwami cita eco caka luleme? Ca kali lili luleme lyoonse. [Mbunga yaamba, “Ameni.”—Mul.] Aboobo amu ndigwasye, Leza ulizi kuti obo mbwini. Takukwe omwe, kwiina mu inyika, ya zyuulu zya zintu zya kaambwa, ezyo Nzya kasola kwiiimpya ku ijwi lyomwe lya nzizyo. Lyoonse cakacitika cakulondoka.

¹⁸⁸ Nokuba ku cindi Ne kali ku Phoenix, buzuba bumwi, na kutandila mwaka wainda kuti cakali obo, a ku mwaambila makani a Mulumbe oyo ali—ali *Ino Nciindi Nzi, Nobaalumi?* Alimwi kamwaambila, “Baangelo bali Ciloba kuti bayo swaaana okuya,” a kujula ezi Zinamatizyo, a cintu. Elyo kuli i—i *Life* magazini yaka bweza caano ca njiyo, eli Bbalabala pati kalitanta mu mulengalenga, mamaile ali makumi otatwe mujulu, makumi obilo aciloba mubukwasule. Ba kati tiiba kakonzya kumvwisyia ncolya kali kwaamba; tabana kuziba. Elyo bantu bakkede moonya mu buyake obu sunumasiku, bakali liimvwi nkoonya okuya a ndime cindi nicaka citika, mbubonya buyo mbo Ca kaamba. Wa kandaambila zintu zyakali kuboola kucitika, akucitika mbubonya buyo. Nzila acimwi ca Zinamatizyo ezyo mbo zyakali kuyo julwa, a kwaamba maseseke akasisidwe muciindi ca makkalo aa basilubambululo abamwi bambi, cakulondoka nconzyo.

¹⁸⁹ Nzila, kabaimvwi atala lya cilundu, baalumi, botatwe na bone babo baimvwi mpoonya awa baliko lino, iifyi, kwinda kuli baabo. Nkeya butanta cilundu, Muuya Uusalala wakati, “Kobweza bbwe eelyo.” Twa kali kuvwima. Wa kati, “Liwaale mu mulengalanga, akwaamba kuti ‘MBUBOOBU MBWAAMBA I MWAMI.’” Nda kacita. Kunselelo okuya kwakasika kambizi ka muuwo kaniini. Nda kati, “Mu maoora ali makumi obilo aone, mula bona janza lya Leza.” Baalumi bakkede mpoonya awa baliko lino.

¹⁹⁰ I buzuba bwakatobela, kutandila teeni okuloko, nkeimvwi alya, Nda kati, “Amu libambile. Koba kunsi lya mootokala,” siluzibo maningi. Nda kati, “Cintucimwi cilafwi kucitika.” Wakali mulengalenga uutakwe cintu, nkoonya kutala ku golonkolo pati. Kwakaseluka Mulilo wakambizi uuzwa ku Julu, canguzu mbuli Mbo wakali kuwuuma, kuuma malambo mbuli

obo. Nda—Nda kaliimvwi nkoonya kunsi lya Nguwo. Nda kasamununa ngowani yangu, kajata mutwe wangu. Wa kasika kutandila tukokola totatwe na tukokola tone atala lyangu, akusya dindi kulaale kuzunguluka obo bulambo mbuli obo, a kubotoka. Elyo kajokela mu luwo, akuzunguluka konse alubo, a kuseluka, ziindi zyotatwe, akwalo kutenda mpela zya ziteo zya masikkweti, kwa mayaadi ali myaanda yobilo. Kumvwa balombwana ka baamba cuti, “Ameni”? Ba kaliko cindi nicaka citika, mwabona, a kubotoka kotatwe.

¹⁹¹ Cindi niba kazwa kunsi lya mootokala a zintuzyonse, ka jokela, kati, “Eco nicaka muuma, nikwaataba kasena kajisi gilizi.”

¹⁹² Nda kati, “Wa kali—Wa kali Nguwe. Wa kali kwaambaula kuli ndime.” Leza ulakanana kwiinda mu kambizi. Mwabona? Elyo ngooyo wakali nguonya Musumpululu wa Mulilo ngo mubona mu cifoto, wiimvwi alya.

Elyo cindi Ni wakatanta, ba kati, “Ino ncinzi?”

Nda kati, “Lubeta lulauma Nkomwe ya Kumbo.”

¹⁹³ Buzuba bwabili kuzwa awo, Alaska yaka tiibbile. Mwabona? Wa kauma lomwe, okuya, kuunga kutaanzi.

¹⁹⁴ Oko, weeleda kucita cintucimwi, kucipa ciiminizyo. Mbuli muntu uubikka munyo mu cinkuli, a ku cisowela mu maanzi, a kuti, “MBUBOOBU MBWAAMBA I MWAMI, akube maanzi mabotu.” Alimwi umwi umbi, Jesu, kabweza maanzi akwatila mu cija, a—a kupanga waini kuzwa kulingawo.

¹⁹⁵ Weeleda kuba a cintucimwi, kupa ciiminizyo. Obo mbo cakabede, eco cakaunka mu luwo akuseluka. Eco caka talisyka kambizi kaniini. Mu maora ali makumi obilo aone, Wa kazungaanya mulundu oyo kusikila waka kasya golonkolopati kuzunguluka ncico.

¹⁹⁶ Muf. Ba. Blair bali kkede awa, Ndali kulanga nkoonya kuli nguwe lino, wakali atala okuya a kubwezelela tumwi tubeela twa ncico, azimwi zimbi. Ngooyu Terry Sothmann, balo, alimwi baliimvwi awa, a Billy Paul. Elyo bakwesu, bunji bwa bamwi abo bali kkede amuno, bakali nkoonya okuya ku kucibona kicitika cindi Ni kakauzapaula.

¹⁹⁷ Ako takali kaano kabuyo. Obo mbwini. Tee lyakali kaindi ku mazuba aa Bbaibbele. Eco ndeenyo. Mwabona? [Mbunga yaamba, “Ameni.”—Mul.] Eyo nguwenya Leza waka nditondezya zintu ezi lyoonse, alimwi zyaka citika, mbubonya obo kweelede. Taakwe ciindi comwe nizya kakakilwa. Lino Ndi kankaizizya Nguwe.

¹⁹⁸ Ii mwiki zisizonto zyainda, Nda kali mu cilengaano. Elyo Nda kaliimvwi atala lya ii—ii busena busumpukide, elyo Nda kali kubona kusondelwa kwa Mbungano. Elyo Nda kaziba, kuzwa kuli wangu... Nda kaliimvwi kuboneka mbuli nzila *eyi*, kulanga Kumbo. Elyo kuboola nzila *eyi* kwakali

cikama ca banakazi babotu, madresi mabotu kapati, masusu malamfu kaabambidwe kabotu kusule, maboko azisama, a misinsi kiyaansi cabulondo. Elyo boonse bakali ku maccing'a mu tyuuni, mbuli, "Kuyaambele, basilumamba Banakristo, kumacching'a kuya ku lumamba, a ciingano ca Jesu kabayabuya kumbele." Elyo mbuli mbo bakainda, Nda kaimikila, nkabela kwakali Cintucimwi okuya, umwi Muuya, wakali Leza, a kuti, "Ngooyo Nabwiinga." Elyo Nda kalanga, nkabela moyo wangu wakali kkomene. Elyo Waa kazunguluka zila *eyi*, akwiindilila kuzunguluka kusule lyangu.

¹⁹⁹ Kwiinde kaindi, cindi na kajokela nzila *eyi*, Wa kati, "Lino mbungano ya busyaasunu ilaboola mu kusondelwa." Elyo mpaawa kwakasika Mbungano yaku Asia. Nseno bwene cikama cisofwi maningi.

²⁰⁰ Mpaawa kwakasika mambungano ambi, aa masi aindene. Akali kuboneka kuyoosya.

²⁰¹ Elyo Nda—Nda amba ceeci nkaambo Ndili sinikizidwe kwaamba bwini, kunembo lya Leza. Elyo cindi Na kati, "Njeeyi yasika mbungano ya America lino, kuti isondelwe," ikuti na Nda kasola kubona cikama ca madaimona, cakali eco. Balo banakazi bakali matanda, a cintu cakale ciboneka kusiyasiya, mbuli mubala wa cikutu ca muzovu. Elyo bakali cijatilide kumbele lyabo, kakutakwe cibeela caatala kuli ncico pee. Elyo bakali kucita musyobo oyo wa zintu, kuti, ezi—ezi zizyano aba bana nzoba cita okuno, abo balibbwayaaula a zintu, a oyo musyobo wa ciimbo kaciabuya. Elyo cindi Ne kabona Muka U.S.A. kalibonya, Nda sitandile kuwizuka.

²⁰² Lino, oyu ngu MBUBOOBU MBWAAMBA I MWAMI. Ikuti na Mula ndisyoma kuba mulanda Wakwe, amundi syome lino. Inga nsewamba ceeco mubuyo mu inyika. Takukwe mali akubwene mu inyika yoonse aku ndibamba kwaamba eco ikuti na tii cakali ca bwini.

²⁰³ Elyo cindi na kainda munsi, eco cakali cintu cakali kuboneka busofwi kapati Nce kasola kubona. Nda kayeeya, "Leza, canguzu mbuli bakambausi a swebo tobabunyina mbo twa kabeleka Ku kujanina Nabwiinga, alimwi ku bubotu nko twa kakonzya." Waa kali kulibbwayaaula, kajatilide *eci* kunembo lyakwe, mbuli umwi wa misinsi eyi ya hula iya cintu, kacijatilide kunembo lya zibeela zyakwe, cibeela cakwe caansi, mbuli *boobu*, kazyana a kulibbwayaaula mbuli bana aba mbo bacita awa aa i...aa zipekupeku ezi zya cisapi nzoba jisi, kulibbwayaaula. Oyo wakali Muka Bunakristo wa America.

²⁰⁴ Aboobo ndigwasye, ku lugwasyo lwa Leza, obo mboi bonena ku meso Akwe. Ndi—Ndi buyo...Nda katalika...Ne kawizuka. Nda kayeeya, "Koonse kusoleka, a kukambauka, a kusungilizya?" Umwi aumwi wabo waka geledwe masusu, elyo bakali kulibbwayaaula a kuyabuya, kaba jatilide *eci*

kunembo. Ba kazunguluka, oko Nkwe kaimvwi a ceeći Cilenge ciindakugambya. Nse kakonzya ku Mu bona. Nda kali ku Mu mvwa kaambaula kuli ndime; wakali ndizungulukide nconzyo. Pele cindi niba kanyonena ku nzila *eyi*, baka jatilide *eci*. Elyo kulibbwayaula buyo a kuseka akuyabuya, akuzumana mbuli obo, kaba jatilide *eci* kunembo lyabo.

²⁰⁵ Lino, mebo nkeimvwi mu Buṣyu Bwakwe okuya, a mulanda Yakwe. “Elyo kuli koonse Nkwe kasola, oko ku bуботу maningi Nkwe kakonzya kucita na?” Nda kayeeya, “Leza, ino mbubotu nzi mbo cindigwasya? Ino mbubotu nzi mbo cicita? Kulila koonse, a kulombelela, a kusungilizya, a zitondezyo a zigambyo a maleele mapati ngo Ka tondezya. A nzila Mbwe kaimikila alya, a kuya ku muunzi a kulila kumane kuba kambaukila a zintu, nkabela ino mbubotu nzi mbo cindigwasya? Elyo mpawo Nde elede kutondezya cintucimwi mbuli eco ca Nduwe, kuba Nabwiinga?”

²⁰⁶ Elyo Mbwe kaimina alya, nkelagide, waa kainda ambali. Elyo inga mwezeezya sule lyakwe, katasamide cintu, kajatilide *eci* kunembo lyakwe mbuli mbwa kali bbwayaula koonse mbuli obo, ku kulibbwayaula oku, kawaala maboko mbuli obo. Elyo, walo, oh, cakali cibyaabi, nzila mbwa kali kulilemeku, mubili wakwe kazungaana koonse mbuli obo. Lino Ndi . . .

²⁰⁷ Nyewebo mwati, “Ino caambanzi, Mukwesu Branham?” Ta ndizi. Ndi mwaambilala buyo Nce kabona.

²⁰⁸ Elyo cindi na kainda ambali mbuli obo, Nda kamulanga. Oh, Nda kawizuka nconzyo. Nda kanyona. Nda kayeeya, “Leza, Nda zulwa. Ta—ta kuyandikana kuli ndime kusola cimwi lino. Ncibotu buyo ndaleka.”

²⁰⁹ Muka. Carl Williams, ikuti na uli kkede awa, alimwi eco ciloto ncoka ndaambila, kaindi kainda, eco ncoka kajisi busiku bwainda, eco cakali kukupenzya, nceeci we. I mudilavo wanyazigwa kuzwa mu janza lyangu.

²¹⁰ Mpawo, Nda kayeeya buyo, “Ndi—Ndi yeeya kuti ndicilube akwalo.” Nda kalimanide.

²¹¹ Mpawo, mpoonya biyo, Nda ka Ci mvwa kacisika alubo. Elyo kulibonya ku lubazu *olu* kwakasika Nabwiinga nguonya oyo wakazungulukila nzila *eyi*. Mpawo kwakasika balindu baniini alubo, alimwi umwi aumwi wabo wakasamide mu cilembo ca cisi cakwe oko kwakali kuzwida, mbuli Switzerland, Germany, azimwi zimbi, aumwi wakasamide oyo musyobo wa cilembo, boonse amasusu malamfu, mbubonya buyo umwi wakali kumatalikilo. Elyo mbaaba bakali kuboola, kabeenda. “Kuyaambela, basilumamba Banakristo, kaba maccing’ a mbuli kuya ku lumamba.” Elyo cindi niba kainda mbali ya kusondelwa oko nko twa kaimvwi, mpoonya biyo, meso oonse akalanga nzila eyo. Elyo mpawo ba kanyona, nkabela bakazumanana kweenda, kumacching’ a.

²¹² Elyo mbo bakatalikila kutanta mu milengalenga, oyu umwi waka tanta jeleelelya cilundu a kuseluka, mbuli *obo*.

²¹³ Aba kabatalika kumacching'a kutanta mu milengalenga. Elyo cindi nibakali kumacching'a, Nda kabona basimbi basyoonto kusule, kalibonya kuti ambwени bakali basimbi baku cisi cimbi, mbuli Sweden na Switzerland, na kumwi. Ba katalika kulanga koonse, a kuba . . . Nda katì, "Muta citi eco! Mutazwi mu ntaamo eyo!" Elyo mbuli Mbwe kakwiila mbuli *obo*, Nda kasika, mu cilengaano, nkeimvwi alya a janza lyangu kubusena mbuli *obo*. Nda kayeeya, "Ee . . ."

²¹⁴ Ako nkekambo Nda amba Nce wamba, sunumasiku. Ndi yanda kumubuzya mubuzyo. Sena oko nkumunisa kwiinda mbo tuyeeya? Sa inga Wa kaitwa a kusalwa kale, kunamatikwa do? Takukabi umwi umbi, nywebo mulizi. Sa inga kwakonzeka? Oh, iifyi. Oh, iifyi.

²¹⁵ Amuyeeye Nce kaamba buzuba bumwi ku kalimbabula. Mu kutintanya kwa poleni mweenze a muzyazi, kuli nseke zili milioni ziinka, maji ali milioni ainka. Pele kuli biyo yomwe yazyo ipona, alimwi, nekubaboobo, imwi aimwi ilakozyanya buya: yomwe kuzwa mu milioni. Oonse awo, maji akozyenye alimwi musyomo omwe wa nseke. Imwi yazyo njiipona. Zimwi zilafwa.

²¹⁶ Taakwe uukonzya kuziba limwi jii liyo bizwa, alimwi, oh, makani ajatikizya ndilyo. Leza weezele kusala eco, naa kuyooba musankwa na musimbi, wamasusu atubuluka na abbulauni usiya, na kufumbwa mbwa kuba. Leza ulasala eco. Kutali imwi iswaana, pele imwi ntaanzi Leza njasala. Ndiza imwi yalibonya *awa*, alimwi imwi . . . Ikuti na mwakasola kubonesya, mu testi tyuubbu, ku zibona antoomwe. Nda kacilangilila. Leza weezele kusala eco. Imwi, imwi aimwi, ilikozyenye loko, pele ku kusalwa. I kuzyalwa kwakunyama nkwa kusalwa. Leza ulabweza yomwe kuzwa mu milioni.

²¹⁷ Cindi Israyeli niyaka siya Egepita, mu lweendo lwabo kuyaku nyika ya cisymezyo, baali kutandila ku bantu basika ku mamilioni obilo. Boonse babo bakali kunsi lya kabelele komwe kacituuzyo, nape niba takapona. Boonse babo kaswiilila Musa, musinsimi. Boonse babo baka bbizigwa kuli nguwe, mu Lwizi Lusalala. Boonse babo baazyana, banakazi antoomwe a Miriamu, atala ansi lya lubazu lwa (cindi) lwa nkomwe yalwizi, cindi Leza naka nyonyoona sinkondo. Boonse babo bakaimikila a Musa, a kumumvwa kaimba mu Muuya. Balo, boonse, bakalya mana azwa mu nkanda, aakaloka kuzwa ku Julu. Mana mapya, masiku onse, ali ncikozyanyo ca Mulumbe, boonse babo bakalya kuzwa kuli ngawo. Pele, kuzwa mu mamilioni obilo, mbangaye baka cikonzya? Bobile. Omwe kuzwa mu milioni.

²¹⁸ Kuli Banakristo batandila mamilioni ali myaanda yosanwe mu inyika sunumsiku, kubala Katolika a boonse. Bategwa basyomi bali mamilioni ali myaanda yosanwe mu inyika. Ikuti

na Kukwempwa kwasika sunumasiku, eco inga caamba... ikuti na omwe kuzwa mu milioni wakali kubalwa. Ta ndaambi kuti cili booboo. Pele ikuti na cakali booboo, bantu bali myaanda yosanwe, mu maoora atobela ali makumi obilo aone, kuteeti kabatako. Inga akwalo tee mwacimvwa. Kuyooba baji batako, nekubabooobo, ba takonzyi akwalo kупедва bulunguluzi.

²¹⁹ Mpawo inga caba, kucitika kuli ndiswe, mweenzuma, mbuli mbo cakacita cindi Johane Mubapatizi nakasika. Abalo basikwiyya bakati, "Nkaambonzi Magwalo alaamba, nkaambonzi balo i—i baapostolo na basinsimi ncoba kaamba, nkaambonzi aamba kuti Eliasi weelede kusaanguna kusika a kuboozezya zintu zyoonse?"

²²⁰ Wa kati, "Nda mwaambila kuti Eliasi wakasika kale, nkabela tiiba baka kuziba."

²²¹ Bumwi bwa mazuba aya inga twa kusyala katukkede awa, "Ino kujatikizya Kukwempwa kakutanaba kupenzegwa kutalika akuyabuya?"

"Kwakasika kale nkabela tii mwaka kuziba."

²²² Oonse Mubili, kanamatikwa mukati, Ku ubamba buyo mu ntaamo. Ta ndaambi kuti cili booboo. Ndi syoma kuti tacili booboo. Pele, mweenzuma, cindi calekela...

²²³ Ikuti na twa limvwa mu moyo wesu, sunumsiku, kuti tweeleda kululamika maumi esu, a zintu nzo twa kacita, andi mukulwaizye, mbuli munyoko mukutausi. Ndi laamba ceeci kwa ciindi cangu citaanzi, aa cikambaukilo. Nda vungulula ambele sunumasiku, aali Ceeci, kwiinda Mbwe kacita ali cili coonse cimbi, kufumbwa ciindi, kulikonse, kumbele lya buleya, nkaambo Nda kajisi lwaanguluko lupati mu miswaangano eyi. Ikuti na mula ndisyoma kuba musinsimi wa Leza, amuswiilile ku cintu Nce mwaambila. Ikuti na kuli kulila komwe kuniini kwa kulimvwa mu moyo wako, koya kuli Leza ndyoonya lino. Ko cicita.

²²⁴ Amwiime aniini, nobantu. Amulange buzumini bwanu—bwanu bwabukombi mbo mubelekela. Amulange mu mambungano anu. Sa kuli mbubonya ku Ijwi lya Leza? Sena mwaka kkwanya zyeelelo zyoonse? Kwaamba, "Ndili muntu uli kabotu." Mbubonya Nikodemu mbwakabede, alimwi boonse bamwi mboba kabede. Ba—ba kali kabotu. Mwabona? Eco ta cijisi cintu cakucita a Ncico.

²²⁵ Elyo, nobanakazi, Ndi yanda kuti mulange mu ciboniboni, a kulanga eco Leza ncayanda mwanakazi kucita. A kubona mu ciboniboni ca Leza, kutali mu ciboniboni canu ca mbungano lino, mu ciboniboni ca Leza; a kubona na mula konzya kweelela, mu buumi bwanu, Nabwiinga wa kumuuya iwa Jesu Kristo.

²²⁶ Nobakutausi, amuyeeye mbubonya. Sena weenguluka makkona awa, ku kuvuna kulimvwa kwa muntuumwi uli

kulaale? Sa inga mwacita *ceeci* ikuti na tii cakali...nkabela bayo kutanda kuzwa mu mbungano? Ikuti ulimvwa booboo, mukwesu uyandwa, andi kucenjezye, mu Zina lya Jesu Kristo, kotija kuzwa kuli ceeco ndyoonya lino.

²²⁷ Elyo, omulindu, ikuti na tokonzyi kulyeeleka kusika ku ceelelo ca Munakristo, kutali mbuli Munakristo wakuzina buyo, pele mu moyo wako, a buumi bwako kabukozyanya ncobeni mbuli satifiketi ya lukwatano lya Leza, okuno, kwaamba kuti cileelede kuba...

²²⁸ Alimwi, simbungano, ikuti na mbungano taili booboo, kukonzya kweelekwa ku ceelelo ca Leza ica Ijwi Lyakwe, kuzwa kuli ncico a kunjila muli Kristo.

²²⁹ Oko nkucenjezya kusetekene. Ta tuzi ciindi mbo cibede, alimwi tazi ciindi mbo cibede, kuti eli dolopo buzuba bumwi liyo lala oku kutako lya lwizi olu.

²³⁰ "Oh, Kapenaumu," wakaamba Jesu, "yebo wakalisumpula ku julu, uyo selusigwa mu gehena. Nkambo, ikuti na milimo yanguzu niya kacitwa mu Sodoma a Gomora, niya ka ciliimvwi ku buzuba obuno." Elyo Sodoma, Gomora zilede kutako lya Lwizi Lufwide. Alimwi Kapenaumu ili kutako lya lwizi.

²³¹ Yebo odolopo, oyo utaminina kuba dolopo lya Baangelo, yebo walisumpula ku julu, a kutuma zintu zya tombe, zyabusofwi zyonse zya mafashioni a zintu, mane alo masi akumbi aboola okuno a kubweza busofwi bwesu a ku butumina, ku mambungano ako mabotu a ngazi, a zimwi, nzila njo cita. Koyeeya, buzuba bumwi uyo lala kutako lya lwizi, kudonkauka kwako kupati kuli kunsi lyako ndyoonya lino. I bukali bwa Leza bulabbya nkoonya kunsi lyako. Nciindi cilamfu buti Mbwayo jatilila oyu mulwi wa musenga kutala okuya? Cindi, olo lwizi kulaale oko, kuyaansi ni maile yomwe, uyo dyobokela omuya, kulaale kujoka ku lwizi lwa Salton. Kuyo indila kubija kwiinda buzuba bwa mamanino bwa Pompeii. Koempwa, Los Angeles.

²³² Amweempwe, anywebo nobamwi, a kuya kuli Leza. I oora lya bukali Bakwe lila atala a nyika. Amucije nokucili ciindi cakucija, a kuboola muli Kristo.

Atu kombe.

²³³ Oyandwa Leza, cindi, mu muuya wangu, mula zungaana, moyo wangu usweka madosi a misozi ya kucenjezya. Kopa, O Leza, kuti baalumi a banakazi bata kayeeyai kuti Nce wamba kundana buyo, a basimbungano bata kaciyeeya mbuli cintucimiwi eco cakali cakucimwa kutali kabotu na kuba lwana. Akube kuti babone, Mwami, kuteeti nduyandisyo.

²³⁴ Ula ndipenda bumboni, Leza Singuzuzyonse, kuti atala ansi lya nkomwe eyi Nkwe kaunka, mwaka a mwaka, kwaambilizya Ijwi Lyako. Kondi penda bumboni, O Leza, ikuti na cila citika sunumasiku, Nda amba Bwini. Yebo ulizi eci cilengaano ca

Nabwiinga kuti nca Bwini. Nda kabweza Zina Lyako kuli ncico, Mwami, a ku caamba kuti wakali MBUBOOBU MBWAAMBA I MWAMI. Alimwi Nda limvvi kuti Nda tweluka, Mwami, kuli eco Nce cita.

²³⁵ Aboobo Nda Ku lomba, Mwami, mu Zina lya Jesu kulekela bantu kuti balizingaanye beni, sunumasiku, a kucija kuzwa ku bukali obo bweelede kusika, nkambo Ikabodi yalembwa atala lya milyango a atala lya masi. Ii mpa isiya ya kulingula yaboola ali njiyo. I Muuya wa Leza wanyonganisigwa kuzwa kuli ncico alimwi bapimwa mu zyelekelo a kujanwa kubula. I pobwe lya Mwaami Nebukadinezara lyaloolola alubo, a maparti akukolwa a banakazi batasamide cakumaninina, kabaliita kuti Mbanakristo.

²³⁶ O Leza waku Julu, kuba a luse ku inyika yabubi a bantu babubi, Mwami, mbuli mbo tubede sunumasiku. Leza, Ndi sola kwiima mu mwaakwe a kulombela luse Lwabuleza, nkabela Uyo kanana ku bbunga eli sunumasiku a kwiita Nabwiinga Wako ku kupakamana, Mwami, kutali kweelana ku citondezyo cimwi cabuzumini bwabukombi, pele ku kumvwa kwa Makanimabotu aa Mwami Jesu Kristo. Ko cipa, O Leza. A cizibwe, busiku obuno, kuti Nduwe Leza, alimwi Ijwi Lyako Mbwindi. Kuciindi, cakusinizya, ku meso aa bantu aba, twa baitila kupakamana ku Ijwi Lyako.

²³⁷ Mu Zina lya Jesu Kristo, Nda balombela, Mwami. Ba Ku bona, kwiindilila ku cimvule cimwi ca kudonaika, kweenda atala lya mabbunga abo a ku baambila cili mu moyo wabo. Elyo Yebo ulizi, Mwami, kuti, mpoonya awa, cintu cicitika. Yebo ulizi obo kuba Bwini, O Leza. Elyo Nda Ku lomba, mu Zina lya Jesu, lekela Muuya Uusalala ukobelezeye alubo, Mwami, a kusomona kuzwa ku nkamu eyi, Mwami abo bakalembwa mu Bbuku lya Buumi lya Kabelele. Ko cipa, O Leza. Nda komba a moyo angu oonse.

²³⁸ Aba bantu, kubupange, Mwami, inga balandipa nkobili lya mamanino ndoba baka jisi, ku kugwasya Mulumbe. Ba cita cili conse ncoba konzya. Pele, O leza, cindi caboola ku kweendelana a Ndilyo, a kuboola kuli Ndilyo, Nda lomba, Leza, kuti obu buyooba busiku bwakuti Uyo balumbula a kutila Muuya Wako Uusalala aa muswaangano oyu wabaiminizi. Alimwi akube kuti kutabi kusobana kwanguzu na kusotauka koonse, pele koomoka a kulila, a kweempwa kaba jatilide ku meja aa cipaililo, kuciindi notu bona mbeta kazipumbulika kunsi lyesu, sunumasiku. Ko cipa, Leza. Nda komba cakusinizya mbuli Mbwe zyi nzila, mu Zina lya Jesu Kristo.

²³⁹ Mukwesu, mucizi wangu, Ta-Ta ndizi kumbi kwa kwaamba, ikuti na Nda jana luzyalo ku meso anu, ku nguzu zya Leza, ikuti na mula ndisyoma kuba musinsimi Wakwe. Eci nciindi citaanzi ku buleya Nce kasola kwaamba ceeco. Pele Ndi limvwa

kucenjezegwa kugambya kwa musyobo umwi. Nse njidwe buya kuli ceeći. Nywebo mulizi kuti Nse citi. Nseli lemeki mbuli boobu. Nda wayawaya kukanana oyo Mulumbe a kwaamba zintu ezyo. Nde enda mu mabazu a zintuzyonse zimbi, ku kutantamuka kucicita. Pele Ca ambwa, nkabela Ciyo ima ku Buzuba bwa Lubeta, mbuli bumboni bwakuti Nda kaamba Bwini. Ngu MBUBOOBU MBWAAMBA I MWAMI! . . . ? . . .

²⁴⁰ Oh, Pentekoste, zuzila buumi bwako. Kotijila ku meja aa cipaililo a koompolola, ciindi kacitaninga kumana, nkambo oora lilasika cindi waakukonzya kulila nkabela taku kagwasyi. Nkambo Esau wakayandaula kujana busena, bwa bupati bwakwe, elyo tako kakonzya ku bujana. Nda kutuula, oh, California. Oh, muswangano wabaiminizi wa Bantu Basimakwebo Bamakanimabotu Azwide, oyo Ngwe yanda, oyo Ngwe kasiya a kujatilila, a moyo wangu oonse, Nda kutuula kuli Jesu Kristo, sunumasiku. Amutijile kuli Nguwe! Muta lekeli dyabulosi kusola kumutontozya kuzwa kul Ceeci. Amukkale a Ndilyo neconzyo kusikila mwaba, umwi aumwi, iizwide Muuya Uusalala, cakuti, kuyo mubamba kaboola ku Ijwi eli, kuti kuyo bamba banakazi kululama, kuti uyo bamba baalumi kululama. Ikuti na waamba kuti ujisi Muuya Uusalala, nkabela toendelani a Ijwi, walo muuya umbi muli nduwe. Muuya wa Leza ulaa Ijwi Lyakwe, Lyabumesiya, Ijwi linanikidwe. I Nabwiinga weelede kuba Mesiya muniiini, Ijwi linanikidwe.

²⁴¹ Atwi imikile ku matende esu, mu Zina lya Mwami Jesu Kristo. Ikuti na mutakamvwi jwi lyangu alubo . . . Pele, na Leza wayanda, Ndi tozya ku Africa, mu maoora masyoonto. Kwayanda nseka bweede. Ta ndizi. Pele Nda mwaambila, a moyo wangu oonse, Nda mwaambila Bwini. Nse keenguluka kumu lungulwida zintuzyonse Leza nzya kandaambila kwaamba. Elyo Nda Ca amba mu Zina lya Mwami.

²⁴² Calo nciindi cisetekene. Ta ndizi nzila yaku citondezya. Nda kasoleka kusiya cikambaukilo ziindi zyotatwe na zyone, nkabela Nse konzyi. Eli ndi ora lisetekene. Muta lilubi. Eci nce ciindi cakuti, ndiza, Leza ubamba lwiito Lwakwe lwamamanino. Ta ndizi. Uyo bamba lwiito Lwakwe lwamamanino, buzubabumwi. Lili? Ta ndizi. Pele Nda mwaambila, kweendelana ku cilengaano eco, kuboneka kuti oyo Nabwiinga utandila kumanizya.

²⁴³ Amulange mambungano akumazina biyo kanjila. Cindi nakalindu woona nasikila Mafuta, waa kakilwa Kwa jana. I Nabwiinga wakanjila. I Kukwempwa kwakacitika. “Kuciindi niba kainka kuyoula Mafuta, Sibwiinga wakasika.”

²⁴⁴ Sena muloon? Amusinsimuke, cakubinda, a kulipempenuna nobeni. Elyo atu kombe, umwi aumwi, mbuli kuti twali kufwa ku kaindi aka, mu Zina lya Mwami. Atu, umwi aumwi, komba mu nzila yako omwini.

²⁴⁵ Leza Singuzuzyonse, koba a luse kuli ndiswe. Mwami, koba a luse kuli ndime. Koba a luse ali ndiswe toonse. Ino cigwasya nzi, takukwe makani eco nco tucita, ikuti na twa kakilwa mu zintu ezi? Nda imikila akulombela luse, O Leza, kumbele ly a dolopo eli pati libbila kunsi kwa lwizi a mbeta zya Leza kazifumpa nkomwe eyi. Nda komba, Leza, kuti Uyo ita Nabwiinga Wako. Nda batuula kuli Nduwe lino, mu Zina ly a Jesu Kristo. Ameni.



IKUSALA NABWIINGA TNG65-0429E
(The Choosing Of A Bride)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Bwane mangolezya, Mukubwekaangala 29, 1965, ku muswangano wabaiminizi iwa Full Gospel Business Men's Fellowship International ku Biltmore Hotel mu Los Angeles, California, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org